

8412Рое-караис

Кара: 5986-А

Апшоръааны Хусеин



СУУАБАДЫКЪНЫ
ДЖОДУ

Лепшокъланы Хусеин

*Джашау аламатды, тюз джолну барсанг,
Гюнахлагъа хорлатмай кесинги.
АЛЛАХНЫ джюрекден чыгъармай турсанг,
Тас этмейин джашарса эсинги.*

СУУАБЛАЫҚЪНЫ ДЖОЛУ

динни юсюнден токъсан тогъуз назму

Къарачай шахар 2006

84(10)00-Кара)6
ББК 86.38
Л 48

Х.У. Лепшоков
Дорога праведности
99 стихотворении о религии Ислам

Редактор ИСМАИЛ хаджи БОСТАНОВ кадий
Духовного Управления мусульман Карачаево-
Черкесской Республики и Ставропольского края,
ректор Исламского института имени имама АБУ-
ХАНИФЫ.

Хусеин Лепшоков в своей книге "Дорога праведности" рассказывает о религии Ислам, о вере человека, о святости, о служении Единому, Великому АЛЛАХУ, Господу миров

Автор призывает идти по пути праведности, указанным Всевышним. Член Союза писателей России, известный карачаевский поэт глубоко и содержательно, просто и доступно излагает основные каноны Ислама и показывает дорогу праведности.

ГОСУДАРСТВЕННАЯ
НАЦИОНАЛЬНАЯ БИБЛИОТЕКА
КАРАЧАЕВО-ЧЕРКЕССКОЙ
РЕСПУБЛИКИ
им. Х.Б. Багратуковой

Кара:
5986-1

© Лепшоков Х.У. 2006

Бисмиллахир-Рахманир-Рахим!

Керти зат толу кёрюннген нюрдю

АЛЛАХ дуниягъа кёб тюрлю саугъа бергенди. Аланы арасында Ислам дин тыйыншлы орун алады. Аны толу тутуб, АЛЛАХХА керти кёуллукъ этиуден уллу сууаблыкъ джокъду. Дин, адамны джашау джолуну тюз устасыды. Биз, муслиманла, АЛЛАХНЫ бирлигине, Мухаммад Аны келечиси болгъанына, сыйлы Къураннга толу ийнанабыз. Сууаблыкъ этиуню биз баш борчларыбызны бирине санайбыз.

Лепшокъланы Хусеинни Ислам динни юсюнден «Сууаблыкъны джолу» деген назму китабы адамны АЛЛАХ кёргюзген джол бла барыргъа чакъырады. Чыгъармада Уллу АЛЛАХНЫ аллында адам кесин къалай тутаргъа кереклиси айтылады. Китабны экинчи бёлюмюне кирген назмуланы арасында Бир АЛЛАХНЫ токъсан тогъуз аты бла байламлы токъсан тогъуз тёрттизгин барды. Андан къалгъан назмула да Ислам динни тамалында джазылгъандыла.

Россияны джазыучуларыны Союзуну члени, белгили къарачайлы поэт, Лепшокъланы Хусеинни китабы адамлагъа ашхы саугъады. Ол динни мардасында, сууаблыкъны тамалында, поэзияны джоругъунда керти, дамлы, солумлу, алапат къарачай тил бла джазылгъанды. «Сууаблыкъны джолу» деген китаб бизни маданиятыбыз бла адабиятыбызгъа да бир джангы атлам болуб кьошулады.

Бу китабны окъурукълагъа мен ашхы саулукъ, толу ийнанмакълукъ, уллу насыб теджейме.

АЛЛАХ рахмат этсин!

Махтаула Уллу АЛЛАХХА, игилик, ашхылыкъ бериб, бизни джокъланганга.

*Къарачай-Черкес Республика бла
Ставрополь крайны муслиманларыны
дин Управлениесини къадысы, Абу-
Ханифа имамны атын джюрютген
Ислам институтну ректору
Бостанланы Исмаил хаджи.*

* * *

Джашау сейирди, заман, кѣанат таууш
эте озуб барады. Биз джашауубузда Уллу
АЛЛАХНЫ кючюн, кѣудуретин ангылаб,
Анга бюсюреу этиб, разылыгыбызны
билдирирге керекбиз. Ёлюм барыбызгѣада
буюрулгѣан заманында джетерикди. Ол
хакъды. Аны сагышын этиб, джашауубуз
тауусулгѣунчун, дуня зауукълукъгѣа
алданыб, бизни джаратхан Бир АЛЛАХНЫ
эсибизден чыгъармайыкъ. Анга баш уруб,
халал урунуб, сууаблыкъ этиб, тюз джолну
барайыкъ. Уллу АЛЛАХХА махтаула
берейик. АЛЛАХДАН тилекле тилеиик,
джерни юсюнде бизге салынган джууаблы
борчну унутмайыкъ, аны толтурургѣа
керекбиз.

Бу китабны чыгъарына юлюш кѣошхан
окъугѣан, анга тынгылаб сагыш этген
адамлагѣа Уллу АЛЛАХ иман, эки дуняда
да насыб берсин. Амин.

Автор

КЪУПХАРЫУНУ ЧОКЪУРАТЪЫ

Хатерли, Халал, АЛЛАХНЫ аты бла!

АЛЛАХНЫ КЪУДУРЕТИ

Бир АЛЛАХДЫ алтын Кюнню
Келбет джуртха тийдирген,
Мийикледе сейир гюлню,
Джылыу бере ёсдюрген.

Таулагъа эм ёзенлеге
Джашил кийим кийдирген,
Гокка ханслы бетледе
Къой сюрюуле кютдюрген.

Джети къатында джерни
Чокъуракъ суу сюздюрген.
Буруб, булут тизгинлени
Мийикледе джюздюрген.

Джауум бериб, джаз, джай кюзде
Уллу байлыкъ битдирген,
Адамланы джер юсюнде
Муратлагъа джетдирген.

Къушланы кёксюл хауада
Учуругъа джаратхан,
Тогъай мюйюз джугъутурну
Тау тёппеден къаратхан.

Алтын Кюнню таякъларын
Ингирликде батдыргъан.
Кечени аякъларын
Къоратыб, танг атдыргъан.

Эртденликде ариулукъгъа,
Сейирликге къаратхан
Дун-дуняда Бир АЛЛАХДЫ,
Хар нени да джаратхан.

Аны ючюн биз тобагъа,
Аккыл болмай, къайтайыкъ.
Аны ючюн биз АЛЛАХХА,
Уллу махтау айтайыкъ.



НЮР ДЖАРЫКЪ

Намаз керти нюр джарыкъды,
Адамны тюз джолгъа салгъан.
Ол сеннге ашхы дагъанды,
АЛЛАХНЫ аллына барсанг.

Ич дуниянгы тазалайды,
Кёб аманлыкъдан сакълайд.
Сууаблыкъны джоралайды,
Джылыуу бла ийнакълайд.

Гюллери чагъыб турады,
Джолубузну бек джарытад.
Чокъуракъ толкъунун бурады,
Бизни джандетге атлатад.

Сууаблыгъы терк джетеди,
Огъур кючюн бизге чачад.
АЛЛАХХА джууукъ элтеди,
Джюрекни тазалаб ачад.



ЗЕКЯТ

Хар джыл сайын рысхынгдан
Борчду зекят берирге.
Алайсыз, сууаблыкъдан
Болмаз къанат керирге.

Сансыз этмей джазыкъны,
Эс бёлсенг джарлылагъа,
Халал болур азыгъынг,
Болушсанг онгсузлагъа.

Сен АЛЛАХХА табыныб
Джашамасанг дунияда,
Айланырса абыныб,
Турсанг да алтын уяда.

Чомарт кьолгъа берекет
Къайтыргъа ёч болад.
Этсенг сууаб харакет,
Дуниянг насыбдан толад.

Зекят бермеген адам,
Джюз абыныр, сюрюнюр.
Садакъа берсенг, тамам
Джашауунг боллукъду нюр.



ОРАЗА

Рамадан ай, нюр чача,
Хар джыл сайын келеди,
Джюрекге мадар ача,
Сууаб саугъа береди.

Ораза тутхан адам
Аны, ашыгъыб, сакълайды.
Таза джюрекден тамам
Кёб сууаблыкъ къатлайды.

Рамадан ай башланса,
Бек джумушакъ халалды.
Ол белине таянса,
Бек сейирлик амалды.

Ай бошала тебресе,
Сууаб хазна джетеди.
Бу айда тилек тиленсе,
АЛЛАХ къабыл этеди.

Оразада шайтанны
Кир муратлары толмайд.
Къадыр* кечеси Рамаданны,
Анга тенг бир зат болмайд.

*Къадыр кече деб Къуранны биринчи аятларын АЛЛАХ Мухаммад файгъамбаргъа (АЛЛАХНЫ саламы анга болсун) кёкден джиберген кечеге айтадыла. Ол кече минг айдан сууабды.

Бир айны АЛЛАХ ючюн
Биз ораза тутабыз.
Сууаб болсун деб хар кюн,
Тилек тилеб турабыз.

Сыйлы айда кече, кюн,
Кёб ашхы зат тилейбиз.
Сууаблыкь джерни юсюн
Кючлеригин излейбиз.

АЛЛАХ, муслиманланы
Къутхар кыйынлыкьладан.
Кенг эт ийнанганланы
Отха къуюллукьладан.



ХАДЖ

Ачханг, саулугъунг болса,
Хадж кылыргъа барырса,
Джюрегинг нюрден толуб,
Кюн таякъча джарырса.

Фарызынгы толтурсанг,
Сен терс атлам этмезсе,
Сууаб хазнадан толсанг,
Гюнах джолну кетмезсе.

Кябада намаз кылыб,
Уллу саугъа алырса,
Онг къолунгу узатыб,
Сыйлы ташха салырса.

Сафа, Марва таулагъа
Сен ашыгъыб чабарса,
Къараб сыйлы Кябагъа,
Къуаннгандан чагъарса.

Мамыр джерде суйюнюб,
Насыб бла байынырса,
Ичингден зарлыкъ кетиб,
Кертиликде айнырса.

Сейирлик Арафатда,
Билим ёлче керирсе,
Джюрегингден махтаула
Сен АЛЛАХХА берирсе.

Муздалифде учунуб,
Акъыл, сезим алырса,
Башхала бла сен туруб,
Намаз къылыб, джарырса.

Муздалифден Минагъа,
Кюн чыкъмайын барырса,
Къууаныб тазалыкъда
Сен ташчыкъла алырса.

Хурмет толуб ёзюнгде,
Джарыкъ нюрге батарса.
Тилек тилеб сёзюнгде,
Хар ташчыкъны атарса.

Борч толтуруб, мал кесиб,
Джарлылагъа чачарса,
Тазалыкъ сенде ёсюб,
Насыб эшик ачарса.

Къошакъ этмей АЛЛАХХА,
Сен ызынга къайтырса.
Джетиб уллу огъургъа,
Сууаб джолда джарырса.



ДЖАШАУНУ МАГЪАНАСЫ

Джашауну магъанасы АЛЛАХХА баш
турууду,
Къуран окъуб, иман бла керти джолда
турууду.
Ёлюмге, туугъаннга, Къыяматха ийнаныуду,
Игиликге къууаныб, аманнга къыйналыуду.

Адам, ырызын тас этмей, юсде тутууду,
Иги юйдеги ёсдюрюб, ачыкъ къууаныуду.
Къуран берген билимге джюрекни кенг
ачыуду,
Хар заманда, хар кюнде АЛЛАХХА
ышаныуду.

Керти ишни, джибин къатлаб, махтаулу
тутууду,
Ата-ананы джарытыб, насыб берген
джылыуду.
Кесинге излегенинги къарнашынга
табыуду,
Бир АЛЛАХХА, арымай, къуллукъ этген
къарыуду.

Башхаланы мамырлы, тюз джолгъа
чакырыуду,
Палахладан къутхарлыкъ, билим тёрде
барыуду,
Сууаблыкъны джулдузун мийикден
къаратыуду,
Ислам динни нюрю бла джюрекни
джарытыуду.

Тюз джолгъа джыйылыб, харамдан кенгде
къалыуду,
Чомартлыкъ нёгер болуб, уллу сууаб
алыуду,
Алдамай, не джашырмай халны тюзюн
айтыуду,
АЛЛАХДАН кечмеклик тилеб, тобагъа
къайтыуду.

Тюз иннет бла дуня Бийге, къурманлыкъ
этиудю,
Шайтан, джиннге алдатмайын, сууаб джолну
кетиудю,
Иннетинг, сёзюнг бир болуб, муратлагъа
джетиудю,
Сыйынг бла, иман бла бу дуниядан кетиудю.



кара: 5986-Д

КАРАЧАЕВО-ЧЕРКЕССКОЙ
РЕСПУБЛИКИ
ИМ. Х.Б. Банди

МУХАММАД ФАЙГЪАМБАР

/АЛЛАХНЫ саламы анга болсун/

Анасындан АЛЛАХ бирди деб, туугъанд,
Зем-зем суу бла суююмлю бетин джуугъанд.
Бисмиллях деб, таза ашарыкъ ашагъанд,
Аны хаман акъ булутчукъ джокълагъанд.

Бу дунягъа сууаб хазна келтиргенд,
Насыб кюнню билими бла тийдиргенд,
Кёб джюрекни гыйы бузун эритгенд,
Ислам динни джер юсюне керилтгенд.

Сууаб иши сау дунягъа айтылгъанд,
Сыйлы аты джети кёкде джазылгъанд,
Айтхандыла аны атын мёлекле,
Уллу кючюн билелле джер этекле.

Дун-дуняны аулагъанды акъылы,
Тюз джолгъа салгъанды амал-такъалы.
Джибраилни кесини сыфатында,
Эки кере кёргенд, тургъанд къатында.

Таза къандан аны джюреги толгъанд,
Сууаб ишни тутуругъу ол болгъанд.
Ашхы динни гюллерид къадар кючю,
Билиминден джарыгъанд джерни юсю.

Анга дери къарангылыкъ хорлагъанд,
Джахиллик да керпеслениб ойнагъанд,
Айланнганды зорлукъ кёблени тутуб,
Уллу, гитче гюнахны бирден джутуб.

Ол туугъанд, ашхылыкъны тёрю болуб,
Саны, къаны сууаблы кючден толуб.
Тюзлюк излеб джарыгъанд аны бети,
Нюр тёкгенди джюреги, бютеу эти.

Сюйюннгенди къарама кенг, джумушакъ,
Ол халкъы бла этгенди джылы ушакъ.
Татлы тилин бек суйгенди миллети,
Насыблыбыз биз да аны уммети.

Къыямат Кюн болушурукъду кёбге,
Байракъ тутуб бурлукъду тегерекге,
Келликле ары бютеу файгъамбарла,
Аны ызындан турлукъла ийнаннганла.

Ол шапагъат берликди муслиманнга,
Мадар излеб кюрешир ийнаннганнга.
Уллу АЛЛАХДАН тилерикди, джалбарыб,
Джандет излеб, ала ючюн къадалыб.



МУСЛИМАНЧЫЛЫГЪЫНГ

Муслиманчылыгъынг сени
Толу иман келтириудю,
Муратларын шайтан, джинни
Джашауунгда ёлтюрюудю.

Бир АЛЛАХНЫ буйрукъларын
Джюрек тёрден толтурууду,
Тыйгъанындан бек сакъланыб,
Анга гамам бойсунууду.

Ол къурагъан бу дуняда
Сыйлы, онглу да болууду,
Ийнаныу бла нюр уяда
Ашхылыкъладан толуюду.

Тюз билим, уллу кюч салыб
Ол суйгенлени суйюудю,
Акъылынга АЛЛАХНЫ алыб,
Кёб игиликле этиудю.

Уллу АЛЛАХНЫ ангылаб,
Анга джюрекни бурууду,
Бюсюреу этиб, разылаб,
Аны унутмай турууду.

Бисмиллях деб, хар ишинги
Ол айтханча башлауду,
Халкъгъа юлешиб билиминги,
Берекетде джашнауду.

Къуран окъуб, намаз этиб,
Оразангы тутууду,
Хадж къылыб, садакъа бериб,
Кёб сууаблыкъ бурууду.

Тилеб, тобагъа къайтыб,
Гюнахынгы кечдириудю,
Ёлгюнчюн тюз затны айтыб,
Сууаб гюлле ёсдюрюудю.

Ислам динни затларына
Дагъан боллукъ къарыуунгду,
Уллу АЛЛАХНЫ аллына
Джарыкъ бетден барыуунгду.



КЪУТХАРЫУНУ ЧОКЪУРАГЪЫ

Ислам динни таза чокъурагъындан,
Суусаб къандырыб, тогъуб ичейик,
Ашхылыкъ джарытхан чучхурларындан
Чомарт юлюшлени биз излейик.

Сабий джыламукъдан таза кёзлеуюнде
Джюрек къылланы ашхы джууайыкъ.
Джумушакъ, салкъын джазгъы кюнлеринде
Сууаблыкъны гюллерин джыяйыкъ.

Сейирлик, таурухлу тангын къучакълаб,
Туру суймекликден биз толайыкъ.
Насыб берген кюмюш шоркъаны ийнакълаб,
Багъалы саугъаны, къууаныб, алайыкъ.

Учундурады сууаб джилтинлери,
Джарыкъ нюр тёгюледи тохтаусуз.
Игиликни сейирлик кюзгюлери,
Тюз джолну кёргюзелле къоркъуусуз.

Фахмулу ишленнгенле аны таулары,
Хазналары кенгнге узакъ джайылыб.
Джюрекге джагъылалла татлы баллары,
Къылларын чакъдырыб, энчи сугъарыб.

Салкъын аязы ийнакълайды, сылайд,
Гюл ийсни тѣгюб юсюбюзге.
Къутхарыуну сууаблыкъ джырын джырлайд,
Насыб джулдузну джандырыб бизге.



АЛЛАХ ТУРУДУ

АЛЛАХ ачыкъды, къарыулуд, кючлюдю,
Нюрю кёклеге, джерге да джетеди.
Тохтаусуз джарытыб турады, кюнлюдю,
Кёкден джерге суюмеклиги энеди.

Ол джангыз бирди. Аны тенгли джокъду,
Арымайды, таркъаймайды, солумайд.
Болгъандан, боллукъдан билими токъду,
Бек кючлюдю, аны бир зат къорумайд.

Ариулукъну, насыбны иесиди,
Анга тенг джокъду, кёреди нени да.
Ол хар тауушну ачыкъ эшитеди,
Билед муратын, сезимин кимни да.

Чомарт джылыуу, джерни джылытады,
Уллу кючюн ол бизге юлешеди.
Джюрекни тамырларын сугъарады,
Ачыкъ тил бла джумушакъ сёлешеди.

Ашхыланыуну АЛЛАХ джетдиреди,
Хар тукъум затланы болдуруучуду.
Тутхан ишин суюгенича этеди,
Кеси разылыгъы бла джаратыучуду.

Игилик бериучю, чырт тауусулмайд,
Ийнаннганны кечиб башлайды.
Аны кѳудуретинден башха зат болмайд,
Хар не, Ол бергенни ашаб джашайды.

Рахматы кенгиге узакъ джайылады,
Дунияланы ол джангыз иесиди.
Кѳкледе, джерде сѳзю сайланады,
Аламда болгъан хазнаны Бийиди.

АЛЛАХУ ТАГЪАЛА бек тюзлюкчюдю,
Хар джаннга тыйыншлысын табдырлыкъды.
Иманлылагъа насыб бериучюдю,
Ийнанмагъанланы азабларыкъды.

Анга баш ургъанны гюнахын кечеди,
Ашхылыкъ бла аны джюрегин джарытады.
Аны тилеклерин къабыл этеди,
Кесини рахматындан табдырады.

АЛЛАХ айыбдан, кемликден тазады,
Джаратылыннган затха ушамайд.
Ол адамлагъа сынаула салады,
Терсни, тюзню сюзед, арымайд, талмайд.

Джер юсюнде кѳулларын джокѳлаучуду,
Аланы Ол хаталадан кѳоруйду.
Адамда билим, иман сакѳлаучуду,
АЛЛАХ кѳулуна джууукѳду, туруду.



КЪУРАН

Уллу АЛЛАХХА баш уруб,
Тюз иннетли болайыкъ.
Сыйлы Къуранны окъуб,
Керти джолну барайыкъ.

Сураларын, аятларын,
Эсибизде тутайыкъ.
Терс ишледен, гюнахладан,
Дайым кери къалайыкъ.

Мухаммадны унутмайын,
Аны джолун барайыкъ.
Ашхылыкъны къурутмайын,
Муратлагъа къарайыкъ.



АЛЛАХХА МАХТАУ

Махтау береме, сыйлы АЛЛАХХА,
Джети кёкню, джерни жаратханнга.
Махтау береме, сыйлы АЛЛАХХА,
Кёкледе, джерде патчах болгъаннга.

Уллу АЛЛАХ кеч деб, баш ургъаннга,
Джазыкъсыныб, кечмеклик беред.
Аны аллында тобукъланганнга,
Рахмат этиб, къанатын керед.

Джашырылгъанны, ачыкъны билген
Залимди ол, дунйяны къурагъан.
Бек махтаулуду хар нени кёрген,
Джер юсюне адамны джайгъан.

Кёкден тюшгенни, кёкге чыкыгъанны,
Барын эслеген, дуния жарыгъыд,
Учхан сезимни, шыбырдагъанны,
Билед, боллукъ затны Патчахыд.

Эм мийик кёкден Ол бизге къарайд,
Тюзлюкню джолун ачыкъ кёргюзте.
Кесиди, бирди, джангызлай турад,
Дунияны чархын бурад, джюрюте.

Джерни юсюнде нюрю танылад,
Халал урунсанг, халал ашатад.
Саулай аламгъа кючю джайылад,
Адам улуну АЛЛАХ джашатад.

АЛЛАХ бирди деб, бек ийнаннганны,
АЛЛАХ кечиб, джандет бла сыйлар.
Анга баш урмай, ассы баргъанны,
АЛЛАХ кючлюд, джаханимде кыйнар.



АЛЛАХНЫ СЮЙГЕНЛЕ

АЛЛАХНЫ суйгенле джандетге барлыкдыла
Насыб кюн джарытыб джолларын,
Анда излемлерин ала табарыкдыла,
Керилтиб сууаблы санларын.

Тюзлюкню, кертиликни ала унутмайын,
АЛЛАХНЫ хар айтханын этиб.
Джюрекни кюзгюсюне букъу кьондурмайын,
Барадыла сууаб джолну кетиб.

Ислам динни джулдузуну нюрюн джукълатмайын.
Анга къайгырыб, кертилик сакълаб.
Ибилисге кеслерин бир да алдатмайын,
Джашайдыла, тюзлюк бла атлаб.

Ала сууаблы да, сыйлы да боладыла,
Насыбны батмазлыкъ кюнюн джарытыб.
Кючленнген иманны нюрюнден толадыла,
Джюрек кыллерын сейир джырлатыб.



САДАКЪА

Садакъасын махтаныб берген дурус тюлд,
Хыликке этгенлени муратлары кюлд.
Аны ашхы кёлюнг бла берирге керекди,
Садакъа-сууаб кёгетли алтын терекди.

Садакъа кёлтюрюб, къучагъынгы керсенг,
Таза джюрегинг бла аны суюб берсенг,
Ол АЛЛАХУ ТАГЪАЛАГЪА джетерикди,
Эки дуниянг да зауукъда ётерикди.

Сууаб ишни кесинг разы болуб этсенг,
Рысхынгдан юлюшлеб, джарыкъ джолну кетсенг,
Къудуретли къабчыгъынга саугъа салырса,
Гюнахдан, джаханимден кенгде къалырса.

Сен джарлыны керекли затын табдырсанг,
Бек къууандырыб, такъыр кёлюн джарытсанг,
Садакъаны тюзю, багъалысы олду,
Аны суюб берген чомарт, халал, къолду.

Садакъа тилесе биреу, къолун узатыб,
Ачлыгъын къоратыргъа, бир къабын къабыб.
Джууаб этиб, къутуруб, аманнга джетме,
Аны мыдах кёзлерине хыны къараб кетме.

Джокълукъну джели аны сюргенд узакъгъа,
Чилле джиб бла онгсузну байлаб тузакъгъа,
Сыйлы АЛЛАХ джаратханд, ол да Аны къулуду.
Джерде джашайд, сенича адам улуду.



МУСЛИМАН БОЛУР

Бир АЛЛАХХА баш ургъан,
Кючлю имандан толур.
Ислам динни бек тутхан,
Керти муслиман болур.

Мухаммад файгъамбарны
Джарыкъ джолун ол тутса,
Терсейгенни, аджашханны,
Кёрюб, тюзюне бурса.

Бизге саугъагъа келген
Ашхы диннге ийнанса.
Адамгъа билим берген,
Нюр Къураннга бойсунса.

Ислам динни джолундан
Чыкъмагъанлай ол барса,
АЛЛАХ берген рысхысындан
Садакъасын бералса.

Мылы кюсегенча джер,
Оразаны сакъласа.
Мангылайдан сюртюб тер,
Ол Кябаны джокъласа.

Кесиндеча хар затын,
Къарнашына табалса.
Ата, ана разылыгъын,
Бу дуняда алалса.

Хыйлагъа, зыйналыкъгъа,
Терилмейин тыйылса.
Къоркъмайын джол узакъдан,
Билим таугъа джыйылса.

Ол берликди тынч джууаб,
Сууаб ёлче керилсе.
Къыямат Кюн иши таб,
Онг джанындан берилсе.



СЕЗЕРСЕ СУУАБНЫ СЮЙЮННГЕНИН

АЛЛАХНЫ унутма, эсгергенлей тур,
Алгъыш джырларынгы сен уятыб.
Патчахха умутунгу, ич дуниянгы бур,
Разылыкъ билдир, Анга къайтыб.

Зикир айт, джарыгъы сеннге келир,
Сыйынг ашхыны мийигине ёрлер.
АЛЛАХНЫ махтагъан насыблы болур,
Иннети, акъылы, сууабны джерлер.

Билмегенинги этме, джандыр джулдуз,
Сакълан амандан, ачмайын ичин.
Тюз сезиминги этмегенлей, мутхуз,
Джарыт джюрекни сууаб кёзлерин.

Джарлыгъа суймеклик джарыгъынгдан бер
Тюртме узакъгъа, анга джууукълаш.
Махтау къанатынгы Бир АЛЛАХХА кер,
Толурса уллу сууабдан джууаш.

Тюзню, тазалыкъны джулдузун джандыр,
Керти сёлеш зикирни хакъындан.
Насыбны заманын соз, узакъ бардыр,
Махтау бер Патчахха джюрек тансыкъдан.

Багъалатыб хурметни сейир гюллерин,
Зикир айт АЛЛАХХА, борчну толтур.
Сезерсе сууабны ашхы суйюннгенин,
Къутхарыгуну сеннге бурулгъанын.



ДЖУУАБЛЫЛЫКЪНЫ СЕЗ

АЛЛАХ кёклени, джерни къурагъанды,
Кюнню, Айны, джулдузланы къаратханды,
Къарангыны эм джарыкъны салгъанды,
Адамны топуракъдан джаратханды.

Инсанны неден да акъыллы этгенди,
Джер юсюнде джашаргъа заман бергенди,
Къалай, турлугъун, этерин кёргюзгенди,
Кёб таша затланы анга билдиргенди.

Хар не да Аны оноундады,
Къыямат Кюн АЛЛАХНЫ къолундады.
Къулуну дараджасын кёргюзтюрюкдю,
Аны джыйгъан хазнасын кёлтюртюрюкдю.



ИЙНАНЫУ ДЖЮРЕКДЕН КЪУРУМАСЫН

Насыбсызды гюнахлагъа хорлатхан,
Хар затха мардасыз берилиб тебреген,
Тюзлюкге джюрек джилтинлерин джукълатхан
Излеген затына кемсиз тюбеген.

Ийнанмагъанлыкъ элтед ачы заманнга,
Аны ахыры джаханимден къаратад.
Сыйсыз этиб, бардырады тубаннга,
Азаблыкъны бек теренине тартад.

Ийнаныу адамны керелейд джарыгъын,
Джунчутмайды, къутхарад гюнахладан.
Табдырады сууаблыкъны азыгъын,
Сыйлы этиб, сакълайды палахладан.

Тюз джашауну бериб, анга къайгъырад,
Ийнаныуну керекди унутмазгъа.
Ислам динни джолунда къууандырад,
Дурусд аны джюрекден къурутмазгъа.



АЛЛАХХА БЕРИЛЕЙИК

Танг алада биз, кюмюш чыкъда атлай,
Тау булбулну ауазына тынгылай,
Эртденликде къууанч, насыб керейик,
Бир АЛЛАХХА кёб махтаула берейик.

Ислам динни джюрекге терен салыб,
Ашхылыкъны учунган джолун алыб,
Толу иманны джарыкъ кючюн сезейик,
Бир АЛЛАХХА кёб махтаула берейик.

Чууакъ кёкде джулдуз сюрюуге къарай,
Толгъан Айны, эркелетиб, ийнакълай,
Къураучуну ашхы кючюн билейик,
Бир АЛЛАХХА кёб махтаула берейик.

Чучхурланы джырларына тынгылай,
Мийик учхан кюмюш тамчыгъа къарай,
Къаяланы, киришлени эслейик,
Бир АЛЛАХХА кёб махтаула берейик.

Тау текеле къая эрнинде ойнай,
Гюллю тауну кюмюш шоркъасы джырлай,
Халкъыбызгъа биз игилик тилейик,
Бир АЛЛАХХА кёб махтаула берейик.

Буу балала ёкюре талалада,
Гара суула секире къаялада,
Ариулукъгъа эсибизни иейик,
Бир АЛЛАХХА кёб махтаула берейик.

Ашхылыкъны сейир гоккасын сылай,
Салкъын аяз тау ёзенлени аулай,
Сууаблыкъны кенг дуниясын сюейик,
Бир АЛЛАХХА кёб махтаула берейик.

Ашыбызгъа, сууубузгъа къууаныб,
Бериучюден тилегибизни табыб,
Кече, кюн да къадалыб кюрешейик,
Бир АЛЛАХХА кёб махтаула берейик.



ДЖУМУШАКЪ АНГЫЛАТ

Джюрек сезиминги эсинг бла ийнакълай,
Керекли магъананы ариу ангылат.

Аузунгдан чыкыгъан балсытхан сёз бла,
джырлай,

Тюшондюр адамны, сылаб, джумушат.

Ачыкъ суююмюнг джарытыб, къучакълай,
Сёзню ариу эшитдир, тамаша болуб.

Татлы тил бла ушакъны бардыр, ачыкълай,
Джюрекеге ётерча, насыбдан толуб.

Джашауну джолларында тёгюле нюрюнг,
АЛЛАХНЫ буйругъун толтурсун сезиминг.
Шохлукъ джашнатханлай, тийиб джарыкъ
кюнюнг,

Ёмюрде джукъланмай, хорласын тёзюмюнг.

Таза иннетинги сен тюзлюк кючюн,

Хазнасын башхагъа сериуон бер.

Адамла сёзюнге суююб тынгылар ючюн,

Айбат сёлеш, ашхылыкъгъа къанат кер.

Къуран юретгенча тюз, керти айтыб,

Адамны терс затдан, аджашыудан тый.

Сёзюнгде, сууаблыкъгъа, АЛЛАХХА къайтыб,

Инсанны башына тюз акъылын джый.

АЛЛАХНЫ СЮЕЙИК

Диннге ийнаныб тутханла мамырлыкъ
АЛЛАХНЫ джолунда этелле джоюм.
Тюзлюкчюле, джюрютгенле сабырлыкъ,
Бийге бойсуналла, этелле оюм.

Ала джашайла, АЛЛАХХА табыныб,
Кеч, деб тилейдиле гюнахларын.
Сюзюб, терс ишлерин базманнга салыб,
Кеч, къурут, деб этген палахларын.

АЛЛАХНЫ кючю тюзлюкню беред,
Керти сюдюд деб, болалла шагъат.
Анга баш ургъан къууанчлыкъ керед,
Джюрегинде аны сууаб гюл чагъад.

АЛЛАХ чомартлыкъны керти иесид,
Кёкледе, джерде нени да кёред.
Ташаны, туруну ачыкъ билиучюд,
Сансыз, санаусуз игилик беред.

Биз Уллу АЛЛАХНЫ кемсиз сюейик,
Файгъамбарыбызны джолун барыб.
Гюнахларыбызны биз кечиртейик,
Тобагъа къайтыб, джюрекле джарыб.



РЫСХЫГЪА БЕРИЛГЕН

Байлыкъны, хазнаны сюйген,
Хыйлалыкъны уста билген,
Фитналыкъгъа берген кесин,
Рысхыгъа бек ийген эсин

Унутады ол АЛЛАХНЫ,
Табады кёб палахны.
Умутлары болуб ассы,
Муратлары-къара, джассы.

Бек джутланыб ачха джыяд,
Тюзлюк джолдан кесин тыяд.
Умуту бийлергед джерни,
Атады ол харам терни.

Эси сагъыш бла таланад,
Харакет санаб, къууанад.
Ачха чыгъарад дженгинден,
Кенгдед джууукъдан, тенгинден.

Аманлыкъ джолда айланад,
Харам хакъ бла байланад.
Терсине бурады кёлюн,
Алай ётдюред ёмюрюн.

Зарлыкъны отундан толуб,
Къотур шайтаннга къул болуб.
Кёб зат урлайд анга базыб,
Джашайд бети, къуту азыб.

Кёз ачаргъа къала ишлейд,
Анда аны тутмакъ кючлейд.
Ачха деген бек джангылтад,
Аманлыкъгъа ол талпытад.

Аллай барады абыныб,
Хазнагъа ёмюрю табыныб.
Джюрегинде гюнах чагъыб,
Джылла озуб, заман саркъыб.

Ол фитнала бла кенгешед,
Рысхы джолунда сермешед,
Кюрешед хаман тырнакълаб,
Тоялмай барад, ыргъакълаб.

Шайтан джолундад барыуу,
Таркъайса да къарыуу.
Джутлукъ къоймайды чырт аны,
Инджилсе да бютеу саны.

Джашайд, иманын тас этиб,
Шайтанны кёлюне джетиб,
Насыбсыз барад ёрлениб,
Ибилис кюч бла джерлениб.

Иннетин къап-къара этиб,
Дуня малгъа эси кетиб.
Аманнга таяныб турад,
Этмейди бир ашхы мурат.

Джалгъан сёзлюдю, тутхучсуз,
Кёрюнед сууукъ гыйы буз.
Ибилисге сый, махтау беред,
Алдауукъгъа къанат керед.

Ол фитна, уятсыз болуб,
Шайтан буйрукъладан толуб,
Эки бетли бла бир болад,
Уллу гюнахладан толад.

Кёбюб джатады, сойланыб,
Ол харамлыкъгъа байланыб,
Айырылмайд джазыкълыкъдан,
Къуру къалад джарыкълыкъдан.

Ауузлада от джандырад,
Аны бла кёлюн къандырад.
Уруш, къазауат да этед,
Шайтанны кёлуне джетед.

Джюрек элиясы чартлайд,
Хыйлалыкъны таймай марайд.
Буугъанды бойнундан джутлукъ,
Иннетине сингнгенд къуртлукъ.

Чыкъмайд гюнахлы къучакъдан,
Азабландырлыкъ тузакъдан,
Ол кирленнген сууда джюзед,
Адамлыкъны джолун юзед.

Тюзюне бурса джюрегин,
Излей АЛЛАХДАН тилегин.
Харам ишледен тыйылыб,
Шерият джорукъгъа сыйыныб.

Болмаз джаханим тамызыкъ,
Шынкъарт отуннга ол азыкъ,
Къураннга толу иер эсин,
Ислам диннге берир кесин.

АЛЛАХ кыйынлыкъ сынатмаз,
Аны, терилтиб, джылатмаз.
Джарыкъ нюр этер кюнлерин,
Ёсдюрюр сууаб гюллерин.



БОЛУРБУЗ КЕЧИЛИРГЕ

Билмей этген аманлыгъынг ючюн,
Терк къайтсанг сен тобагъа.
Ёкюнюб, тилеб кюрешсенг бютюн,
Чыгъыб тюшюннген талагъа.

Аллай тобаны АЛЛАХ къабыл этед,
Акъылман эшитед тилекни.
Тилекчиге кечмеклик да беред,
Хазнадан чакъдырады джерни.

АЛЛАХ хатерлид, аны билейик,
Кюрешейик биз тюзелирге.
Аны рахматын кюсеб излейик,
Болурбуз джашауда кечилирге.



СУУАБ ИШНИ УНУТМА

Харамладан сакълансанг,
Сен тюзлюкчю болурса.
Сууаблыкъ бла джакълансанг,
Сен насыбдан толурса.

Душманлыкъны кючюн чачсанг,
Сен сууаблыкъ табарса.
Шохлукъгъа къучакъ ачсанг,
Шох юйюрге джашарса.

Игилик этиб, къууансанг,
Сен джарсыуланы билмезсе.
Аманлыгъынга кыйналсанг,
Гюнахлагъа дженгдирмезсе.

Джюрек кылынгы кыйнарыкъ,
Затны этмезсе, тутмазса.
Ашхылыкъ бла саугъаларыкъ,
Иги ишни унутмазса.



НЮР ДЖУЛДУЗ ДЖАНАР

АЛЛАХНЫ, адамланы аллында тохтаусуз
Сыйынгы тюшюрлюк зат этме, тыйыл.
Иманынгы джарыт, джандыр сууаб джулдуз.
Баш ур АЛЛАХХА, тюз джолгъа джыйыл.

Толтур игиликден джюрегинги, эсинги,
АЛЛАХ бергенд ашхылыкъ джер юсюне.
Сууаб ишлеге хазырла кесинги.
Билим бла бурул сен тюзюне.

Букъу тенгли бир болса да, игиликле эт,
Бютеу гюнахладан сен бол узакъда.
Ачыуланмай, даулашмай муратлагъа джет,
Чомарт юлгюлю насыбны тутарса къолда.

Тюзлюкню чокъурагъын изле ашыгъыш,
Кертиликни кючюн бегит арада.
Джумушакълыкъны джырын джырла, эт алгъыш,
Игилик ёсдюр ашхы къалада.

Джюрек чучхурну эшитиб сен тауушун,
Тюз иннет бла ишле этсенг къайгъырыб,
Джанынг къууаныр, кёрюб гюллени ауушун,
Нюр джулдуз джанар, джолунгу джарытыб.



БИЛИМ

Билим джюреклени алтын гюлюд.
Ол ашхылыкъны сейир булбулуд.
Сууаблыкъны джарытхан кюнюд,
Аманлыкъдан сакълагъан джулдузд.

Сен гитчеликден окъургъа берил,
Эринчекликге хорлатма, кюреш.
Толу билим алыб, рахат керил,
Мамырлыкъ орнат, ашхылыкъ юлеш.

Басымлы, адебли, сен сабыр бол,
Намысны тутуб, тол тазалыкъдан.
Устазынгы сыйла, билимге ач джол,
Джашна огъурлукъну джарыгъындан.

Ата-ананы айтханларын эт,
Сёлешме алагъа ачыуланыб.
Тёзюмлю болуб, насыбынга джет,
Ёсдюргенле сени, кыйын салыб.

Ала джашау хазнангдыла, нюрюнг
Сабийликде, толсанг да акъ тюкледен,
Дамлы насыбынг, уллу хурметинг.
Сеннге кюн тиеди огъур кёзледен.



НАМАЗ

Намаз - ийнаныуну кючлю дагъаныды,
Намаз - джюрекни дарман-дарысыды.

Намаз - иманны чыммакъ къанатларыды,
Намаз - джандетни гюллю тауларыды.

Намаз - генезирликден кери этеди,
Намаз - сууаблыкъ тёрюне элтеди.

Намаз - кёкюрекде нюрню джарыгъыды,
Намаз - акъылны сейир чырагъыды.

Намаз - тазалыкъны кёк чокъурагъыды,
Намаз - рахатлыкъны джазгъы балхамыды.

Намаз - къарнашлыкъны кючюн бегитеди,
Намаз - шохлукъну кёпюрлерин ишлетеди.

Намаз - игиликле, хайыр табдырады,
Намаз - ачыуну узакъгъа атдырады.

Намаз - джаннга игиликле этдиреди,
Намаз - джандет насыбха джетдиреди.



МЕДЖГИТ

Муслиманны меджгити кьаласыд, аралыгъыд,
Сыйлылыкъны, сууаблыкъны, хар заман
тазалыгъы

Анда ашхы джамагъат, кьууаныб, намаз этед,
Ислам динни джолунда кёб муратлагъа джетед.

Таза гюллери чагъыб, алайгъа адам барад,
Намаз этиб, ол джарыб, нюрленнген
сыфат ала

Ийиледи башхала бла бир борчундан кьутулад,
Сууаблыны кечилиб, кёб гюнахы кьурутулад.

Таб сюелед АЛЛАХНЫ юйю, Кяба таба айланды
Минарала кёкге джете, Ай сурат бла байланыб
Муслиманла кьыбылагъа буралла джюреклерин,
АЛЛАХХА баш урадыла, ийилтиб
кёкюреклерин



АЛЛАХХА ТОЛУ ЫШАН

Дуниягъа АЛЛАХ нюр беред,
Джерни юсюн джашнатад.
Кюмюш чыкъ бла насыб келед,
Рахат тангла атдырад.

Къууанчны къанатын керед,
Бек уллуд, берекетлид.
Къыйналмай хар неге джетед,
Джарыкъды, харакетлид.

Аны нюрю сеннге келир,
АЛЛАХХА толу ышан.
Тюз джолда таукел элтир,
Джол устанг болур Къуран.

Игиликни кёб этсенг,
Чомартлыкъ сенде болур.
Уллу АЛЛАХНЫ эсгерсенг,
Джашауунг нюрден толур.

Излемеген ол джарыкъны,
Тубандача абыныр.
Шайтан кючлеб аны санын,
Ол гюнах бла къабыныр.



АЛЛАХ ГЮНАХЫН КЕЧЕД КЪУЛУНУ

Гюнахларынга кечмеклик тилесенг,
Джыламукъла агъызыб, мюкюл болсанг,
Айыблы, терс ишинге эсинги бёлсенг,
Аны къайтармай игиликден толсанг,

Сен дининги, атмайын, керти тутсанг,
Уллу АЛЛАХДАН игиликле тилеб,
Нюрлю джулдузну кенгнге джарытсанг,
Санларынгы тыймай, тюзюне илеб,

АЛЛАХХА баш уруб, бек джалынсанг,
Игиликни гюлю бетингде орналыб,
Джалбарыб, бел бюгюб, тобукълансанг,
Унутмай Патчахха къайтсанг къадалыб,

Сен сабырлыкъны джюрекге салыб,
Шербет кёзлеуча игиликле этсенг,
Джангур тамчыча кетмей терк саркъыб,
Бел къатдырыб, тюз джолну кетсенг,

Топуракъдан къураб, АЛЛАХ, джан салыб,
Джер юсюне ийгенд адам улуну.
Бу дуняда аны тилегин алыб,
Этген гюнахларын кечед къулуну.



ПАЛАХДАН, АЗАБДАН САКЪЛАР

Бир АЛЛАХНЫ Раббий этгенлеге,
Ол иннетден таймай ёлгенлеге,
Къыямат Кюнде болмаз бир къоркъуу,
Алагъа келмез сокъуранныкъ къалкъуу.

Адам этген ишини дараджасын
Кёрюр джашауда, джыйгъан хазнасын.
Сайлагъан джолу сыртындан басыб,
Къыйынындан табарыкъды насыб.

Ийнанмагъаннга кёб палах джетер,
Аны хар затын кёмюр кюл этер.
Ол Залимни буйругъу бла болур,
Ассылыкъ этген азабдан толур.

Эртделеде элле болгъанла тюб,
Къуругъанла шахарла, джерге кёмюлюб.
Тариххе къараб, биз тюшкюнейик,
Эс джыйыб, тюзлюкде кёрюнейик.

АЛЛАХДАН башха бир зат болушмаз,
Къутхаргъан джолда бизге джолукъмаз.
Къуран айтханны этиб джашайыкъ,
АЛЛАХХА къайтыб, Анга баш урайыкъ.

Аллах гюнахларыбызны кечер,
Тюзюуюн джанны сууаблы этер.
Шайтандан, джинден бизни кьоруулар,
Хар палахдан, азабдан сакълар.



ДЖАНДЕТ

Бир АЛЛАХХА баш ургъан,
Тынчлыкъ табад санына.
Мухаммадха ийнанган,
Сууаб алад джанына.

Аллай къулну юсюнде
Гюнахлары аз болур,
Уллу Къыямат Кюнде
Этген мураты толур.

Териси, эти къатмаз,
Азабны кючю джетмез.
Ишин солундан алмаз,
От ауузуна тюшмез.

Нюр джаныб бютеу саны,
Кирир насыб эшикге.
Аны къууанчлы джаны,
Тюшер таза джандетге.

Анда, сейирлик джерде,
Толу зауукъда джашар.
Насыблы, мийик тёрде,
Дамлы ашарыкъ ашар.

Салкъынлада айланыб,
Бал къобанладан ичер.
Ашхылыкъ бла байланыб,
Сют ёзенлеге тюшер.

Этер татлы ушагъын,
Сейир джарыкъдан толуб.
Эркин джая къучагъын,
Терек тюбюнде солуб.

Хар заманда нюрлениб,
Ол муратына джетер.
Мамырлыкъгъа бёлениб,
Къууанч тёрюне ётер.

Джандет ачыкъ иманлыгъа,
Анда джокъду бир къаугъа.
Ол ёмюр джашау анга,
Болады насыб саугъа.



СЕННГЕ ДЖЕТГЕННИ ЭТ

Адеб-намысны сакълаб тамалын,
Сен аман затладан тый кесинги.
Таб ашхылыкъны кючлю амалын,
Магъанасызгъа йиме эсинги.

Тюзлюкню сакъла, кетме АЛЛАХДАН,
Аманатны сен бер иесине.
Керти бол, сакълан палахдан,
Сезим къанатынгы кер Раббийге.

Артыкъ сёзню сен айтмай тынгылаб,
Динни джорукъларын тутуб джаша.
АЛЛАХНЫ кючлюлюгюн ангылаб,
Иманлы болуб, халал аш аша.

Билмегенинги билгенлеге сор,
Терс сёлешиб, джунчутма адамны.
Тюз билим берген Къураннга бол къор,
Сен унутма Патчахын аламны.



ДЖАХАНИМ ДЖУТАРЫКЪДЫ

АЛЛАХХА баш урмагъанны, къоймайын
джангыз бирин,
Джаханим от джутарыкъды, ичерикди ол
ирин.

Ары баргъан кюерикди, тутуб рысхы
къадарын,
Джанын джарты иерикди, табмай ёлюр
мадарын.

От кирликди санына, мыйысы къайнаб
тарала,
Ачы тукъум джанарыкъла кёз тюблери,
къарала.
Джаякъ эти эририкди, къуюллукуду суу
болуб,
Бишген бурну созуллукуду, от таракъладан
толуб.

Кыстыланган эринлеге, шынкъарт джетер
шууулдай,
Толкъунлары кёрюнюрле, таууш этиб
дынгырдай.
Гюнах этген къоллары, гюрюлдерле,
чыккырдай,
Буту, аягъы бек къайнар, тохтамайын
чырылдай.

Джиликлери джабышырла, азаб къаты
къысханлай,
От къуюлур джюрегине, таууш этиб,
табанлай.
Боркъулдарла, къайнарла къан тамырлары,
джылай,
Джерде этген терслиги ючюн, азабланыр
ол алай.

Тохтамайын кёзлеринден, къайнаб, джыламукъ
агъар,
Эти, териси, джауу, шынкъарт отда джанар,
Аны ачы азабын гюнахлы бойнуна тагъар,
Джаханимни теренинде от кюзгюлеге
къарар.

Къыйынлыкъны хазнасын, къарылыб, тунчугъа,
джутар,
Къарнында, ашхынында ол отну ачыуун
тутар.
Хауа джетмей джаханимни азаб кёгетин
ашар,
Не ёлмей, не тирилмей, ол къыйынлыкъда
джашар.



АЛЛАХ БИРДИ

Ийнанама, АЛЛАХ бирди,
Кючю кёбдю, Къудуретлид.
Ийнанама, АЛЛАХ бирди,
Ол Рахматлы, Рахимлид.

Ийнанама, АЛЛАХ бирди,
Туудурмагъанд, туумагъанд.
Ийнанама, АЛЛАХ бирди,
Анга тенг чырт болмагъанд.

Ийнанама, АЛЛАХ бирди,
Кёклени, джерни джаратхан.
Ийнанама, АЛЛАХ бирди,
Кюнню, Айны къаратхан.

Ийнанама, АЛЛАХ бирди,
Джан салыучу, ол Раббийд.
Ийнанама, АЛЛАХ бирди,
Хар джаннга джангыз бир Бийд.



КЁРГЮЗТЕЙИК ТИРИЛИК

АЛЛАХ бизге орун бергенд джер юсюнде,
Джашау керек табдыргъанды джер джюзюнде.
Билим алыб, тюз тутайыкъ динибизни,
Тазалайыкъ, тюзетейик тилибизни.

Сураланы джууукъ этиб кесибизге,
Аятларын биз тутайыкъ эсибизде.
Сууаблыкъ бла ариулайыкъ юсюбюзню.
Кюрешейик, бош йимейик кюнубюзню.

Керти джолну эшиклерин биз ачайыкъ,
Зулмулукъну тот бугъоуларын чачайыкъ.
Къучакъ керейик, этейик кёб игилик,
Сууаб джолда кёргюзтейик биз тирилик.



ИМАНЛЫ БОЛАЙЫКЪ

Къалырла АЛЛАХХА къошакъ къошханла
Сууабсыз, шапагъатсыз, юлюшсюз.
Намысларын, бетлерин атханла,
Азабдан толуб, боллукъла кюнсюз.

Уллу АЛЛАХ къарамаз алагъа,
Тюлдюле Анга берилгенледен.
Къошар джаханимге барлыкълагъа,
Этмез насыбдан керилгенледен.

Биз рысхыбыздан эм аламатын,
АЛЛАХНЫ джолунда джояйыкъ.
Кериб сыйлылыкъны акъ къанатын,
Игиликден, сууабдан толайыкъ.

Биз, алданыб, шайтан ашны джутуб,
АЛЛАХХА айтмайыкъ ётюрюк.
Терсеймейик, къыйсыкълыкъны тутуб,
Болсун бизни джолубуз тюзлюк.

Бурулушлукъдан тыйылайыкъ кенгде,
Бир АЛЛАХХА тюзюуюн чакъырыб.
Ашхылыкъгъа бурулайыкъ джерде,
Сууаб джолда барайыкъ, джарыб.

Агъарлыкъдыла, Келлик Кюн бетле,
Сууаб ишлери аланы кёрюнюб.
Бирледе къараллыкъдыла бетле,
Этген гюнахлары базманда дженгиб.

Къаралгъанла, бютеу имансызла
Тюшерикдиле ачы азабха.
Бетлери сый бла агъаргъанла
Бёленникдиле джарыкъ рахматха.



ИЗЛЕГЕНИНИ КЪУЛУДУ

Дуния зауукъгъа толу берилген
Учад къара булутланы ичинде.
Аны кемсиз этиб, суйюб керилген
Гюнахладан толад джерни юсюнде.

Эсин ташлаб, суймеклик бла баргъан,
Терседи, кетед аны джылыуу.
Дуния кюн бла мардасыз къатланган,
Джангылады, шайтан джолдад турууу.

Излегенин табханына къууаныб,
Джюзеди алдауукъну тузагъында.
Харамлыкъдан Ибилис бла джубаныб,
Барады аманлыкъны хазнасында.

Ол адам джалгъанды, ётюрюк къаяд,
Бир зат ючюн намысын атыб кетед.
Аны аягъы гюнахлыкъ бла таяд,
Кеси азаб кюнню тёрюне джетед.

Излемине берилиб, чабыб баргъан
Джангылады, алдатад зауукълукъгъа.
Къанын-джанын алдауукъгъа салгъан
Сатылады кёзюулю дуния хакъгъа.

Терсейиуге галпыб, баш ургъан бир затха
Къураучугъа къошакъ къошад дуняда.
Кеклени, джерни Бийи АЛЛАХХА
Баш урмагъан джашайд шайтан уяда.



РАЗЫМА АЛЛАХХА

АЛЛАХ бирд ёмюрлеге,
Патчахлыгы келгенди.
Джерни юсюне, чууакъ кёкге,
Сейир сыфат бергенди.

Къураб джарыкъ дунияны,
Эм мийикде турады.
Джерде джашау уяны
Чархын сейир бурады.

Джаратханд тауну, тюзню,
Бизге ашхы болурча.
Джасайды джазны, кюзню,
Биз зауукъда солурча.

Адамны джетишдириб,
Ол кеси джаратханды.
Ангы, акъыл, кёзле бериб,
Дуниягъа къаратханды.

Баш урууда АЛЛАХХА
Кёб ашхы зат кёреме.
Дунияда бир Патчахха,
Уллу махтау береме.



БЕРЕДИ ОНГЛА

Шайтан хорламаз АЛЛАХХА ийнаннганны,
Харам хакъгъа джетдирмей тут къолланы.
Халы джарыр тирилиуде къыйналгъанны,
Таукел баргъанны сууаб джолланы.

АЛЛАХ къулуна насыб береди толу.
Аны джюрегингден айырмай сакъла.
Иман, саулукъ-муслиманчылыкъны джолу,
Харакетинг болур, Ислам динни джакъла.

АЛЛАХ тюрлендиреди, иги этеди халны,
Атдырады насыблы, джарыкъ тангла.
Баш ур АЛЛАХХА аудурады джылланы,
Береди дуняда, ахыратда онгла.



ИЕСИ САКЪЛАРЫКЪДЫ

Иеменнге Абриха патчах болуб салыннганды,
АЛЛАХНЫ юйюн джокъ этерме, къурутурма
деб алыннганды.

Къралда бар меджгитлени бири къалмай
джабылсын!

Оноуума къаршчыла бары къырылыб
атылсын!

Тохтамайын ичи буруб, джан-джанын
ашагъанды,

Къутургъан джаныуарча, къан ичиб
джашагъанды.

Залимме деб, ёхтемленнгенд, кёлюне алай
келгенди,

Ханны акъылы, сагъышы джер юсюне
бёлюннгенди.

Сауутлу аскерчиле таугъа, тюзге
джайылгъанла,

Учунуб, джалкъаларын артларына
къайыргъанла.

Узакъ джолгъа тебрегенле, санлары
ойнагъанды,

Дюнгордегенд джюреклери, къанлары
къайнагъанды.

Тайыф шахарны юсю бла Меккагъа
атланганла,
Пилли сауутлу аскерле, кыппача
къатланганла
Абриха ёшюн тургъузуб, шахаргъа
джолукъгъанды,
Ассы аскерчилерин къум тюзде
солутханды.

Шахар тамада келсин деб, келечисин
ийгенди,
Бети-къуту да кетиб, шайтан тонун
кийгенди.
Къураиш джамагъатдан Абдул-Муталиб
баргъанды,
Ол, башын ёрге тутуб, аны аллына
тургъанды.

Тюз иннетин билмейин, Абриха анга
тюбегенди,
Залим тауча, ол ётгюрге, кюлмейин,
сейирсиннгенди.
Айтханд, къараб тылмачына, сор бу нени
сюеди,
Мени аллымда къашын, башын,
къоркъмайын,
нек тюеди?

Тылмач анга соргъанында, ол терк джууаб
бергенди,
Тюелерин аскерчиле сюргенлерин
кӕргенди.
Ётгюр къанын къайната, къайтарсынла, деб
айтханды,
Учундуруб, билеклерин ол хауада
ойнатханды.

Ол заманда Абриха, тыпырдаб,
кычыргъанды,
Къургъакъсыгъан эринлерин, ачуланыб,
кысханды.
Муслиманны Белгисин мен тюбю бла
чачарыкъма,
Миллетине, кесине да азабла ачарыкъма.

Кӕзю чыгъаргъа джетиб, билмеймид деб,
кычыргъанды,
Башы, аягъы къалтырай, ол аны
марагъанды.
Абдул-Муталиб айтханды, меники
тюелелле,
Экиджюзю да алайда, таулача, сюелелле.

Сыйлы Кябаны иеси барды, аны
сакъларыкъды,

Кёрюб, эшитиб турад, кьаласын
джакъларыкъды.
Абриха, бетин кьаралтыб, Кяба таба
бургъанды,
Менден сакълаяллыкъмыд, деб кёкюрегин
ургъанды.

Къалай суйсенг алай эт деб туюге ол
миннгенди,
Къайгъы этиб шахарына, бек ашыгъыш
киргенди.
Адамланы терк джыйыб, толу хапар
айтханды,
Таулагъа элтиб аланы, ол Кябагъа
къайтханды.

Тилек тилеб Бир АЛЛАХДАН, ызларындан
кетгенди.
Узакъ таулу кьоюнлада джамагъатын
джетгенди.
Ол заманда Абриха пилли аскерин
тизгенди.
Кяба меникиди деб, харам терин
сюртгенди.

Пиллени сюргенликге, тебмегенди бири да,

Толмагъанды Абриханы мураты, кир
иннети да.
Сейир зат бла чырмалыб, пилле бары
джатханла,
Туралмайын бурулуб, къум тюзде
аунагъанла.

Къайдан эсе да чыгъыб, къанатлыла
учханла,
Хар бирини болгъанд ташы, чууакъ кёкню
джабханла.
Ол ташланы ала атыб джау аскерни
ургъанла,
Бирин къоймай душманланы, кёмюр кюлге
бургъанла.

Менме деген Абриха, санын кючден
кёлтюргенди,
Кёкню, джерни бирден джабхан, уллу кючге
тюбегенди.
Зорлукъ излеб, муслиманны Белгисине
келгенди,
Эти, саны айырылыб, кеси ауруб ёлгенди.



ДУНИЯЛАНЫ БИЙИДИ

Бир АЛЛАХДЫ сени, мени,
Хар нени да джаратхан.
Чууакъ кёкден сейир джерге,
Джулдузланы къаратхан.

Ол чомартды, къайгырыучу,
Хатерлиди, бек Халалд.
Гюнахладан къутхарыучу,
Дуниялагъа ол тамалд.

Туудурмагъанд, туумагъанд,
Бир АЛЛАХУ ТАГЪАЛАМ.
Олду адамны джаратхан,
Джарытхан саулай алам.

Къураучуд, Джаратыучуд,
Джан салыучу Раббийди.
Кёрюннген, кёрюнмеген,
Дунияланы Бийиди.



ДЖАНДЕТДЕ ЗАУУКЪЛАНЫРСА

АЛЛАХДАН кьоркъгъаннъа игилик келир,
Джандет эшиклерин кенгнгине керир.
Ол адам АЛЛАХХА джууукъда болур,
Аны рахматындан, кючюнден толур.

АЛЛАХ сени сыйлы этиб джаратханд,
Джерни юсюне сынаргъа салгъанд.
Игиликле этсенг, табарса сууаб,
Келлик Кюн АЛЛАХХА берликсе джууаб.

Киши рысхы джыймасанг, кьол узатыб,
Терсликни джаймасанг, буйрукъну сатыб.
Джюрегингден ашхылыкъны кьурутуб,
Сени АЛЛАХ джаратханын унутуб.

Ёсерсе, гюнахсыз сакълансанг кесинг,
АЛЛАХХА кетиб алданмазлыкъ эсинг.
Дин макъам бла джюрекни джырлатсанг,
Тюзлюкню джулдузун джукълатмай турсанг.

Раббийни дининден керти билим ал,
Сууаб базманынга уллу хазна сал.
Билим баш урууну дараджасын беред,
Эслиликни къанатын мийикге керед.

Сен иги халинг бла АЛЛАХДАН кьоркьсанг,
Адамлагъа керти, тюз, ачыкъ болсанг,
Хорланмазса, тирилерсе джангыдан,
Сакъланырса, кюч алырса АЛЛАХДАН.

Тынчлыкъда Раббийни эсингде тутсанг,
Ол сени джокълар, кыйынлыкъда турсанг.
Сеннге шайтан, джин, аманлыкъ этмез,
АЛЛАХ болушса, берекетинг кетмез.

Акъылынг джарыр, джюрегинг тюз урур,
Таукеллигинг кючюн бегитир, бурур.
Раббийни унутма, ол сени сакълар,
Аны сейир кючю кьуру да джакълар.

Кьошакъ этмегенлей, эсингде тутсанг,
АЛЛАХХА баш уруб, сый бериб турсанг.
Кёклени эм джерни тенглиги болгъан
Джандетге элтир, ашхылыкъдан толгъан.



ЁКСЮЗНЮ ХАКЪЫ

Ёксюзню хакъын ашагъан зулмулукъда,
Сарнарыкъды, къарнын отдан толтурлукъду.
Гюнахлы джашагъан къаралгъан булутда,
Джалынлаб джаннган отда олтурлукъду.

Ёксюзню мюлкюне керекди тиймезге,
Аманатны толу къайтарлыкъ кюч барды.
Аманлыкъ ишлени кюрешсенг этмезге,
Джюрегинг имандан тамызыкъ алгъанды.

АЛЛАХ саугъалайды Анга ийнаннганны,
Къошуб, аны юлюшюн кёб этеди.
Керти джолда элтеди тюзлюк тутханны,
Акъылманны кючю неге да джетеди.



ИГИЛИК КЪАТЛАУ

Иги этсенг, сууаблыкъ аласа,
Джарсыуларынг кетиб, нюр джанаса.
Сен шериятны джоругъун сакълайса,
Факъырны, ёксюзню, сакъатны джакълайса.

Ийнаныу джюрекни игилигиди,
Тилинги, сёзюнгю кирсизлигиди,
АЛЛАХХА баш уруб, атын айтыуду,
Динни джоругъуна, Анга къайтыуду.

Хар заманда бошалмазлыкъ къарыуду,
Халал аш ашаб, тюзюне барыуду.
Харамдан, терсен кенгде къалыуду,
Огъур ишле этиб, сууаб алыуду.

Аны тилеги АЛЛАХХА джетеди,
Кёб гюнахлары юсюнден кетеди.
Ол ашхылыкъ, игилик да этеди,
Адамланы тюзлюкге юретеди.



ТЮРЛЕНМЕЙДИ

АЛЛАХ бирча турады, тюрленмейди,
Ёмюрлени бурады, джылла салыб.
Залимге бир зат да джукъ эталмайды,
Ол джашатад, бийликни төрюн алыб.

Сыфаты бизге ачыкъ кёрюнмейди,
Алай а, билед адамны джарсыларын.
Ол турады, ёмюрледе тюрленмейди,
Кёреди, джокъларыкъды онгсузларын.

Аны сёзю бизге джетед, тюрленмейин,
Китаблада тили бла файгъамбарны.
Сууаблыгъа джол береди, терсейтмейин,
Турады джюрегинде ийнаннганны.

Тюз джашаугъа бурады, джунчутмайын,
Кертиликни базманына насыб сала.
Ийилгенле джерге унутулмайын,
Таурат, Сабур, Инджиль, Къуран саугъала.

Къымылдагъанны къалмайды эшитмейин,
Ол болса да, узакъда, бек мийикде.
Джукъ этилмейд Анга ачыкъ кёрюнмейин,
Кёкледе, джерде сау дунияны юсюнде.

Сау аламда кѳреди, кыйналмайын,
Гитчени да, уллуну да, хар джанны,
Кече-кюн сагъайыбды, арымайын,
Джер юсюне беред насыб хазнаны.



ДИННИ ТАТЛЫЛЫГЪЫ

Ислам динди адамны кѳууандыргъан,
Балдан татлы болуб, аны алландыргъан,
Ийнаннганны джанын нюр бла джасагъан,
Сезиминде, акъылында джашагъан.

Суусабынгы кѳандырады, ийнакълай,
Учунмакълыкъ берек нюрю, кѳучакълай.
Ашхы умутну уяндырады, джырлай,
Кюн таякълары тиелле, джылтырай.

Ол дарман-дарыды, санны багъыучуд,
Джюрекдени теренинде чагъыучуд.
Булбулу джырлайд, джюуюлдей сѳзледе,
Джилтинлери кѳюнелле кѳзледе.

Сюймеклиги кертилигид, тюзлюгюд,
Бир АЛЛАХХА бойсундуруучу нюрюд.
Джер юсюнде ашхылыкъ бла бурулуб,
Турады ол, кѳкден джерге кѳурулуб.

Ол кѳууанчды, игиликди эм саугъад,
Адамлагъа билим берген тамашад.
Джукъланмазлыкъ джулдузу джарыкъ джанад,
Соруллыкъ Кюн кѳутхарлыкъ гюлю чагъад.

Тюзлюк тутхан сууаблы джолда барыр,
Динни огъурлу джылыуунда джарыр.
Джюреги, эси бла АЛЛАХХА баш урур,
Сюймеклигин Анга бютеулей бурур.



БЕРИЛЛИКДИ ДЖУУАБ

Келлик Кюн айтырыкъды адам улу,
Джашауун нелляй халда ашыргъанын.
Чертерикди кимни болгъанын къулу,
Тыйгъыч салыннгандан къалай тыйылгъанын.

Ол билимин не джолда джюрютгенини,
Билдирир халын, джашауун булгъай,
Джерде къаллай иш бла кюрешгенини,
Тамалын бек ачар, деялмай огъай.

Ол, табыб, кѣргюзтюр бютеу рысхысын,
Къайдан алгъанын, кертисин айтыр,
Не затны джыйгъанын, сууаб хазнасын
Тизер, хар ишини ызына къайтыр.

Айтыр тѣнгегин къалай тутханын,
Хапарлар неге хайырландыргъанын.
Толу айгъакълар, не джолну баргъанын,
Къалай джюрютгенин нафсынын, санларын.



ДЖАНГЫ ЗАТ ТЮРЛЕНИУДЮ

Ислам дин толуд гюлден, насыбдан,
Таурухлуд аны ачыкъ джырлары,
Тёрю, этеги гюнахдан сакълайд,
Джанны джарытад, джокъду бузлары.

Тюрлениулени унамайд Къуран,
Шериятда джангы зат орун алса.
Терсди, басарыкъды къара тубан,
Динде болмагъан, анга кириб къалса.

Ол оюм хадисде да айтылад,
Къуралышдырылгъан тюртюлед
узакъгъа. Эсгертилинед, анга къайтылад,
Алай этген тюшед гюнах тузакъгъа.

Билдириу зынгырдайд, этед таууш,
Ангыламакълыкъны джаяд джерге.
Чокъуракъ тегеди анда аууш,
Айтады, билдиреди джюрек тёрге.

Диннге джангы кирген зат-тюрлениуд,
Ачы сууукъду, кюлдю, къарад.
Ол джангылыуд, уллу гюнах этиуд,
Тюрлениу излеген терсине барад.



ДУНИЯ БИЙГЕ БОЙСУНАЙЫКЪ

Иманлылалла тобагъа къайтычула,
Уллу АЛЛАХНЫ, суюуб, махтаучула.
Акъылманнга тюз къуллукъ этиучюле,
Игиликни урлугъун себиучюле.

Ийнаннганла, ораза тутуучула,
Таза джюрекден намаз къылычула.
Джашауда аманлыкъны тыйычула,
Ислам динни джолун барычула.

Сейир джаратылгъан кёкледегиле,
АЛЛАХНЫКЪЫЛАДЫЛА джердегиле.
Тирилтед, ёлтюрעד, хар не къолундад,
Насыбланнган адам аны джолундад.

АЛЛАХХА баш ургъаннга джокъду къоркъуу,
Боллукъду аллайгъа къууанчдан толуу.
Айтханындан бир да къайтмайды Раббий,
Саугъалайды хар къулун дуния Бий.

Ол берген азабны бир кюч къоратмаз,
Ким бирлешсе да, бир джукъ эталмаз.
Къууанч бла саугъалаб, берсе тириликни,
Бир зат тыялмаз келген игиликни.



АЧЫУЛАНМА

Ачыуландыргъан затладан кери бол,
Сабырлыкъда сакълан къара булутдан.
Хайыр берлик ашхы кючден чомарт тол,
Айырылмай джаша сен тюз умутдан.

Ачыуну къозгъагъан ишид шайтанны,
Ол адамланы гюнах джолгъа элтед.
Джесирлендириб, джаяды аманны,
Алагъа хатаны, гюнахны джюклетед.

Сени къанынгы бурса ачыу кызыу,
Айлан гюлlege, барма аны джолун.
АЛЛАХ тыйгъанны этме, табмазса джылыу,
Къыяматда тутарса азабны къолун.

Биреуню кечген, ачыуну кѣлтюрюб,
Ол тѣзюмлюд, нюр джарыкыгъа да ушайд.
Ибилисни кир муратларын ѣлтюрюб,
Тѣзед, аны сууаб булбулу джырлайд.



БЁГЕКЛИКНИ ЮСДЕН КЪУРУТАЙЫКЪ

АЛЛАХ кёклени бири-бири юсюнде,
Арымай, тиреусюз кёлтюреди.
Болджалгъа дери Кюн бла Айны кёкде
Тыйыншлысыча таб джюрютеди.

Джерни къураб, анда салгъанд таулары,
Ол ёзен суулары джаратханды
Зауукълу джашатыргъа адамлары,
Терекледен кёгетле ашатады.

Тюзледе чайкъалгъан будай сабанла,
Гургумла, такъюзюк да чагъалла.
Джашнагъан таурухлу джюзюм бачхала,
Бары бир суу бла сугъарылалла.

Кёб зат этилгенд мамырлы дуняда,
Кюндюз кече бла ауушунады.
Сагъышланнганнга, эс ийгеннге анда,
Къутхарыллыкъ магъана табылады.

Ислам динни тюздю, джарыкъды джолу,
АЛЛАХ кёрюучюд, бек билиучюд.
Андан кечим тилейик джюрек толу,
Ол кючлюд, кечмеклик бериучюд.

Ийген игилигини джерни юсюне,
Санаб санауна джеталмазбыз.
Бизге борч салганд, джашаргъа тюзюне,
Аманлыкъ этиб къутулалмазбыз.

Хазнасын иелеб, джырабыз сууну,
Тенгизни бизге бойсундургъанды.
Юсден къурутайыкъ бёгеклик ууну,
АЛЛАХ кючлюд, бизни джаратханды.



СУУАБЛЫКЪНЫ ДЖОЛУ

АЛЛАХ буюргъанча, биз тюз джашайыкъ,
Таукел атлайыкъ, алгъа тюз джолда.
Къыйынлыкъдан, палахдан сакъланайыкъ,
Сыйсыз болмайын, джомакълы джуртда.

Терсни, тюзню билейик, айырайыкъ,
Сюйюб къарайыкъ джайгъы эртденнге.
Гюнахлы ишге джалкъа къайырайыкъ,
АЛЛАХХА бойсун, нюр келир сеннге.

Баш урмайыкъ АЛЛАХДАН башха затха,
Сууаблыкъны нюр джолун къурутуб.
Мйнейик иман деген дюлдюр атха,
Гюнахлыкъны, сатлыкъны унутуб.

Динибизге, тилибизге бек болуб,
Джашау джолда сууаблыкъ табайыкъ.
АЛЛАХДАН келген джарыкъ нюрден толуб,
Тюзлюкню тутуб алгъа барайыкъ.

Унутмайыкъ, АЛЛАХ беред ашхылыкъ,
Къуран алыб, сура окъуб кюрешейик.
Къурумасын юсюбюзден мамырлыкъ,
Сууаб джолда къууанч бла тюбешейик.

Соруу соруллуб Къыямат Кюн, джунчумай.
Джууаб берирча харакетден толайыкъ.
Термилмейин, отда кюймей, къыйналмай,
Айтыр сёзюбюзню эсге алайыкъ.



КЕСИНЕ ЭТЕД АМАНЛЫКЪ

Адам гюнах этсе, амандан джубанад,
Джюрегин къап-къара кир этиб тебрейд
Къалгъан аман иши, тютюнлеб, джанад,
Аны юсюн бютеулей къара кюч кючлейд.

Аман бла айтдырад дуниягъа атын,
Игиликни отун, джибитиб, джукълатад.
Тюрлендириб ол тюрсюнюн, сыфатын,
Къуру аманлыкъла этерге тартад.

Башхагъа, зарланыб, хыянат этген
Биринчи кесине этеди аманлыкъ.
Огъурсузлукъгъа, къутсузгъа джетген
Кёрлюкдю кемсиз, ачы къыйынлыкъ.

Уллу АЛЛАХ сен тюзет, сакъла азабдан,
Джаныбызнн къууандыр, сууаб кюч алдыр,
Эки дунияда да, кери эт палахдан,
Сен суйгенле бла ашхылыкъда къалдыр.



ДЖУМУШАКЪЛЫКЪ

Джумушакълыкъны игиди макъамы,
Сыфатында сейир гюлле чагъалла,
Джюрек къанны джылытады саркъгъаны,
Джилтинлери сууаблыкъ бла багъалла.

Кёлтюреди адамны дараджасын,
Нюрлендириб гюнах затдан тыяды.
Ашхылыкъдан джюклейд аны аркъасын,
Тёгерекге дамлы джылыу джаяды.

Ол джашнайды насыб тауну тёппесинде,
Кюн джылыугъа къанатларын кереди.
Чагъад, ёсед джюреклени төрюнде,
Дамлылыкъны нюр сезимин береди.

Джумушакълыкъ байлам тутхан затларын,
Ариу этиб, джашнатады, джасайды.
Бир-бирледе джашырыб арыгъанын,
Ариу гюлча, ышарыб, шош къарайды.



АЛЛАХХА КЪАЙТАЙЫКЪ

АЛЛАХХА къуллукъ этген
Уллу насыбха джетер.
Къураннга эсин ийген
Сууаблыкъ хазна этер.

Ол, тобагъа къайытыб,
Керти, тюз джолну барыр.
АЛЛАХХА махтау айтыб,
Къууаныр, нюрден джарыр.

Ата-ананы джылатмаз,
Рахат тёрде олтурур.
Джюрекдени таралтмаз,
Бала борчун толтурур.

АЛЛАХХА ассы баргъан
Гюнах джолда абыныр.
Ангын терсине бургъан
Ол шайтаннга табыныр.

Аллай инсан ач отха
Ёмюрлеге атылыр.
АЛЛАХСЫЗ къартха, джашха
От къыйынлыкъ къатылыр.

Джюрек тёрден таралыб,
Биз тобагъа къайтайыкъ.
Бир АЛЛАХХА къадалыб,
Кёб махтаула айтайыкъ.



ДЖЮРЕКЛЕНИ ДЖАРЫТХАНД

Мухаммад дамлы адам болгъанды,
Кёрюннгенди аны ариу халиси.
Джумушакълыкъдан нюрден толгъанды,
Хурметлик бла байланыб ашхы эси.

Ол сабийлени бютюн бек суйгенди,
Къойнунда олтургъандыла ала.
Ийнакълагъанды, ала бла кюлгенди,
Болгъанды джазыкъсынмакълыкъ къала.

Къарыусузлагъа ариу айтханды,
Джюрегини тёрюнден къайгъырыб.
Сакъатлагъа да ол болушханды,
Джарлылагъа бергенд юлюш, айырыб.

Ёксюзлени башларын сылагъанды,
Ашларын, сууларын чомарт бериб.
Баргъан джерине хурмет салгъанды,
Ислам динни кючюн джайгъанды, кериб.



ТЁЗЮМ НЮРДЮ

Тёзум нюрдю джюрекни джарытхан,
Аны гюллерин ариу чакъдыргъан,
Тазады, ашхылыкъгъа къаратхан,
Билсек, уллу къудурет табдыргъан.

Адамны тюзюне бурады, тартад,
Уруш этиб, дженгилликден сакълайд,
Чокъуракъ сууча, хар саннга джарайд,
Дарман болуб, инсанны джакълайд.

Тёзумю болгъан мийикде джюзед,
Басымлылыкъны табыб хазнасын.
Имансызлыкъны сынджырын юзед,
Сезим къонгурауу салат багъасын.

Тёзум ол кючдю, АЛЛАХДАН келед,
Кёблени джолларын джарытад.
Джюреклеге мамырлыкъ беред,
Ашхылыкъда тюзюне джашатад.

Иманы, тёзумлюлюгю болгъан,
Уллу АЛЛАХДАН кёб саугъа алыр.
Акъылдан, сабырлылыкъдан толгъан,
Сууаб джолда джарыгъанлай барыр.



УЛЛУ МАХТАУ БЕРЕМЕ

Бир АЛЛАХ танг джарытады,
Булбулланы уятады,
Уллу махтау береме.

Эртденнге кьууандырады,
Сейир джырла джырлатады,
Уллу махтау береме.

Кюнню кёзюн кьаратады,
Табигъатха джан салады,
Уллу махтау береме.

Тау кьушланы учурады,
Кёкге мийик чыгъарады,
Уллу махтау береме.

Джугъутурну чабдырады,
Кюмюш тамчы акъдырады,
Уллу махтау береме.

Буу баланы айнытады,
Ёзенледе ойнатады,
Уллу махтау береме.

Дамлы джангур джаудурады,
Иги битим алдырады,
Уллу махтау береме.

Сау дуниягъа нюр себеди,
Ашхылыкъны ёсдюреди,
Уллу махтау береме.



АЛЛАХ КЁРГЮЗГЕНЧА БАРАЙЫКЪ

Ийнаналла муслиманла
АЛЛАХНЫ бирлигине.
Ийнанадыла ала
Кёкде мёлеклерине.

Китабларына, джандетге,
Уллу кёб хурметине.
Азаб берген джаханимге,
Келген келечилерине.

Ахыр Кюннге, Тирилиуге,
Эс бёлелле джарыкъ тангнга.
Тюзлюк тутхан Хукму Кюннге,
Бютеу АЛЛАХ буюргъаннга.

Къутуллукъдула тынч ала
Къыйынлыкъладан бирге.
Кери болурла, нюр джана,
Къуюллукъладан кирге.

Эшитмез, билмез ёмюрде
Ийнанмагъан чырт аны.
Турмаз динде тюзюне,
Терсейгенд эси, саны.

Эсинде аманлыкъ ойнайд,
Къаугъад аны сагъышы.
Зарлыкъны отунда къайнайд,
Масхабсызд шайтанны ашы.

Ол къап-къара бузукъ джаяд,
Джерни юсюне учуруб.
Шайтан бла бирге таяд,
Сау дуниягъа къутуруб.

Къарангылыкъ басыб турад,
Ол къауумну джолларын.
Керилиб къыйынлыкъ урад,
Бууад харам къолларын.

Аланы аманлыкъларын,
АЛЛАХ берир башларына.
Джыйгъанларын, гюнахларын,
Къошдуруп ашларына.

Аллай къауум джаханимни,
Ахлулары болурла.
Аны бек теренини,
Хазнасындан толурла.



СУУАБ ГЮЛЛЕРИ ЁСЮБ

Ислам динни ачыкъ кёзлю гюллери,
Джукъланмазлыкъ джулдузу насыб беред,
Джырлы тили, таза кёзлеу сёзлери,
Батмай турлукъ нюр кюню джарыкъ тегед.

Джюрекни ачхан сейирлик шоркъасы,
Татлы ауазы ийнакълайды, джырлайд.
Къууанч берген толкъунланы аркъасы,
Чомарт кючу чакъдырад, ариу ойнайд.

Къутхарылыу баш урууду АЛЛАХХА,
Джюрек тёрде иман болуб, бек суюб.
Аламатды къанат керген насыбха,
Тюз сезимде сууаб гюллери ёсюб.



УЛЛУ ШИРК ЭТМЕ

Кёб тюрлю аман зат барды,
Адамны тюз джолдан тайдыргъан.
Аманны джюреги къарады, тарды,
Сыйны, намысны да атдыргъан.

Ол гюнах этдирге умут этеди,
Харам ишни арагъа салыб.
Аллай кюч имансызгъа джетеди,
Аны акъылын, эсин да алыб.

АЛЛАХДАН башхадан джукъ тилеме,
Бериучю бирди, ёмюрлегед.
Сен имансызны ашын излеме,
Аны бла барлыгъынг джаханимгед.

Ёлгенден сен болушлукъ табмазса,
Джаратылгъандан джокъду мадар.
Аладан бир да джууаб алмазса,
Сыйсыз болуб, кёрмезсе къадар.

Къурманлыкъ АЛЛАХХА этериксе,
Уллу ширк этмей, джан къутхарыб.
Сууаб джолну сен кетериксе,
Насыбны байрагъы бла барыб.



АЛЛАХХА БАШ УР

Бизни дуния сейирликди, зауукъду,
Кёк джулдуздан, джер гюлден джасалгъанды.
Къуралгъанды, биз джашагъан таурухду,
Ариулукъну дамлы кючю джашнагъанды.

Адамланы АЛЛАХ джерге ийгенди,
Нюр тёгюлгенд, суймеклик да чакъгъанды.
Алтын Кюнню нюр таягъы тийгенди,
Джауум джауб, булутдан суу акъгъанды.

Чучхурла да, саркъыб баргъан суула да,
Джерни тешиб, хапарлашыб, чыгъалла.
Отлайдыла гаммешле да, буула да,
Джугъутурла къаяда турушалла.

Тау булбулла татлы джырла джырлайла,
Къууанчлары мийикде кёрюнеди.
Учундургъан макъамлары джашайла,
Джюреклеге зауукълукъ бериледи.

Ол игини джерге АЛЛАХ ийгенди,
Сен Патчахха баш уругъа борчлуса.
Къудуретлини кючю сени сюеди,
АЛЛАХ берген харакетден толуса.

Бу дунияны кѣурагъанды, кючлюдю,
Джарлы, бай да джюрюрча этгенди.
Кѣклени, джерни кѣурагъан Хакимди,
Сайлау бериб, адамны тирилтгенди.

Тюзюн, кертисин кѣрсюн деб кѣз бергенди,
Кѣулакъла да, эшитиб, алгъа барырча.
Кертиликни тюз джолун кѣргюзгенди,
Джюрек сезиб, тюзюне атланырча.

Сынау джашау, кѣанат кѣагъыб, кетеди,
Ёлор заман инсаннга кѣатыллыкъды.
Аны джерде ахыр кюню джетеди,
Сууаб, гюнах этгени саналлыкъды.

О, Адам! сен джер юсюнде джашайса,
Терсни, тюзню айыр, АЛЛАХ кѣреди,
Ол табдыргъан азыкъланы ашайса,
Аны нюрю сеннге насыб береди.

Эшит сѣзюн, Кѣуранда кѣрюнеди,
Магъанасы нюр кюч бла ачылыбды.
Суралагъа, аятлагъа бѣлюнеди,
Джан кѣутхаргъан кѣанатлы ашхылыкъды.

Терк баргъан джылларынгы бош ашырма,
Той, оюннга, рысхыгъа да алданма.
Шайтан, джин бла шох болуб, сен джырлама,
АЛЛАХ бла бол, Анга баш ур, тохтама!



УНУТМА АЛЛАХЫНГЫ

Бир джарыкъ нюр чачылыр,
Меджигитге джыйылгъаннга.
Джандет эшик ачылыр,
АЛЛАХХА сыйыннганнга.

Къыркъ кюнню бирге къылгъан
Беш ууахты намазын,
Эки бетли, не джалгъан
Билсин чыртда болмазын.

Намаз этсенг заманында,
Сен толурса насыбдан,
Сууаблыкъны тамалында
Къарарса джашауунгдан.

Билим алсанг сен джарыкъ,
Болурса тюз иннетли,
Тутуб сени сууаблыкъ,
Этер нюрлю, хурметли.

Табсанг да ауруу, джунчуу,
Къурутма намазынгы.
Шайтан, джинден чыгъар уу,
Унутма АЛЛАХЫНГЫ.



СЕНИ ШОХЛАРЫНГ

Сени шохларынг – АЛЛАХНЫ кѳулла­ры,
Аманлыкѳдан кеслерин тыйгѳанла.
Сууаблыланы бютеулей саулары,
АЛЛАХНЫ джолунда баргѳанла.

Сени блады, толу зекят бериучю,
Мукѳмин, рукугѳ этиучю джашауда.
Ашхылыкѳ башхалагѳа кѳргюзюучю,
Бир-бирин кечген разылыкѳ табыуда.

Сеннге нѳгерле, гюнахдан тыйылгѳанла,
Бузукѳсузла, кертини сѳлешгенле,
АЛЛАХНЫ сѳзюне толу сыйынганла,
Игиликлени джайыб кюрешгенле.



ДЖАШАМАЙДЫ ТУРСА ДА ДЖЫЛТЫРАБ

Баш уругъа тыйыншлы АЛЛАХДЫ къуру,
Къудуретлини аллында биз ийилеиик.
Бизге келед Аны джарыгъы, джылыуу,
Джюрегибиз нюрден толуб, суююнейик.

Джумушакъ джылыталла нюрю, кёрюую,
Джашауну чакъдырады. Ол кертн сюдюд.
Бизге джууукъду, къууандырад эс бёлюую,
Аны джолу джандетге элтирик гюлюд.

АЛЛАХХА бойсунайыкъ, масхабха кириб,
Кертини джаяйыкъ, ётюрюкню буууб.
Заман, кёлеккеча, терк кетгенин билиб,
Тюз оюм биз этейик тамаша туууб.

Къошакъ къошмай бир АЛЛАХХА баш
урганнга,
Файгъамбарыбыз да шапагъатлыкъ этер.
Акылын, санын Бийге бойсундурганнга,
Джомакълы джандетни сейир тёрю джетер.

АЛЛАХНЫ сѳйген терен сезеди динни,
Джюреклени уятыб, игилик джаяд.
Джулдузлу кѳкню, керед гюллю кюйюзню,
Аманлыкъгъа къаршчы тургъан мермер къаяд.

Кюч береди Ислам дин джарыкъ ёсюмге,
Аны булбулу джумушакъ джырын джырлайд.
Джюрегин бѳлмеген дуня сѳйюмге,
Кеси джашамайды, турса да джылтыраб.



ГИТЧЕ ШИРК

АЛЛАХНЫ аты бла ант этсенг,
Берген сёзюнге керти бол.
Сен, ёсюб, мийикге джетсенг,
Адамлыкъдан, ашхылыкъдан тол.

Башха зат бла антынг ширк болад,
Ибилис къурайд чомарт болум.
Сууаблыкъ, сый да, кенгде къалад,
Узаялла насыб бла солум.

Гитче ширкди бетсиниб чыкъгъан,
Ол, боранлаб, джюрекге киред.
Туура анычад дууа такъгъан,
Акъылынг анга учуб кёчед.

Болад гитче ширк кёб затдан,
Ол барады терсине джертин.
Алдаб, бурулуб, чыгъад джолдан,
Шынкъартха элтед азаб джилтин.

АЛЛАХ аллайны кечмейди бютюн,
Аны джюрегин бууад ач тузакъ.
Эсин кюйдюред чыдамсыз тютюн,
От къыйынлыкъ тартады узакъ.



ИЙНАНЫРГЪА КЕРЕКДИ

Бек сыйларгъа керекди
Бир АЛЛАХНЫ мёлеклерин.
Билим алтын терекди,
Билдирген келечилерин.

Ийнанмай насыб джокъду,
Аны китабларына.
Кючюн сезерге боллукъду,
Эс ийиб къадарына.

Дунияда адам къоймай,
Кючлерикди ёлум, джетиб.
Хукму Кюнде иннет оймай,
Раббий сюер, сау этиб.

Хар неге кючю джетеди,
Дуния Бийни, АЛЛАХНЫ.
Халал рысхы береди,
Багъалатад ийнаннганны.

Ол гюнахларын кечеди,
Анга баш ургъанланы.
Бет джарыкълыла этеди,
Керти муслиманланы.



КЪУТХАРЛЫКЪ ХАРАКЕТ

Билиб, билмей этген гюнахларынг ючюн,
Кечмеклик тилесенг сыйлы Патчахдан,
Ачыкъ, джашыртын терс ишлеринг ючюн,
Тоба этиб, кечим излесенг АЛЛАХДАН.

Ачыкъны, джашырылгъанны Ол билед,
Кючлю, Къудуретли кечерге да болур.
Ол тѣзюмлю, тилеучю къулларын сюед,
Хатерли сеннге джазыкъсыныудан толур.

АЛЛАХ махтаулуд, мийикдед, уллуд,
Андан сора джокъду уллу кюч къудурет.
Джандетге элтген аны сууаблы джолуд,
Излейик, джыяйыкъ къутхарлыкъ харакет.



ИМАН ДЖЮРЕКГЕ СИНГСЕ

Къуралгъанча тенгиз тамчыдан,
Джыйылалла кючлеб гюнахла.
Къуюлгъанча джангур булутдан,
Берликдиле къулла джууабла.

Джашауда этилген хар атлам,
Тюшерикди сѣзсюз тергеуге.
Иннетле, умутла эм къарам
Барлыкъла саналыб эсебге.

Сууаблыкъ къатлагъан дуняда
Онгузну джакълагъан кюнюнде,
Рахатлы, мамырлы уяда
Сюйюнюр, нюр джана юсюнде.

Ол таза ашарыкъны ашар,
Чокъуракъ бал сууда багъылыб.
Таурухлу, нюр таякъча, джашар,
Джолуна гюл кийиз джайылыб.

Ислам дин чакъдырса джюрекни,
Къылларын минг макъам бла согъуб.
Сюйдюред бир-бирине миллетни,
Ашхылыкъ, тюз иннет да толуб.

Дунягъа, суююнлюб, ол къарар,
Кёз ачыб файгъамбар айтханнга.
Ёксюзге, онгсузгъа да джарар,
Къууаныб АЛЛАХХА къайтханнга.

Ибилис адамны кючлерге,
Кесине тартыргъа кюрешед.
Иман джюрекге бир сингсе,
Аны хорлайды, тентиретед.



КЪОРКЪАЙЫКЪ ДЖАКЪСЫЗЛЫКЪДАН

Бир АЛЛАХХА ийнанмагъанла
Дуняда табмазла бир сууаб.
Ассылыкъны сатыб алгъанла,
Мугурланыб, этерле джууаб.

АЛЛАХ азаб берир алагъа,
Къанларын толтурур амандан.
Тюзню элтир сууаб талагъа,
Айырыб гюнахлы джамандан.

Адам кёрюр келген ёлюмню,
Бирлеге джетер къыйынлыкъдан.
Тутхан тюзлюкню эм тёзюмню
Толлукъду джандет зауукълукъдан.

АЛЛАХ тутад кёкле бла джерни,
Къалгъан затха да кючу джетед.
Кече, кюн Бийид иеликни,
Отха атханын бедишлик этед.

Анга баш урайыкъ, тюзлюк тутуб,
Къорууланайыкъ ассылыкъдан.
Къоймайыкъ игиликни къурутуб,
Къоркъайыкъ бизле джакъсызлыкъдан.



АШХЫ МУРАТ

Бирле дуня зауугъун излейле,
Аланы джюреклері аны тюзлейле,
Аллай терсине учады, таяды,
Джерни юсюне къучагъын джаяды.

Муратха, ишге багъа бериледи,
Анга кере сууаб ёлче кериледи.
Ол динни тутурукъларыны бириди,
Джюрекни, акъылны кенг билимиди.

Ашхы мурат нюрдю, джарыкъ гюлдю.
Ол керти затды, терс боллукъ тюлдю.
Аны дараджасы мийикди, кенгди,
Бизни тюзетген ышангылы тенгди.

Сен аккыллы болгъан бир затны этме,
Акъылынгы ташлаб, терс джолну кетме.
Ишекли болгъанынгы къолгъа алма,
Терсейиб, сууаблыкъдан къуру къалма.

Тюзлюк изле, умутунгу джукълатма,
Чомарт таукеллен, шайтаннга алдатма.
Керти, тюз затны джолунгдан къурутма,
Кёзбаугъа берилиб, кесинги унутма.



ТЮЗ БИЛИМ АЛ

Узакъ болса да, барыб билим ал,
Тёзюмлю бол, кьурутма ышанчны.
Джюрегинги бютеу тюз джолгъа сал,
Сен сезерсе бир ашхы кьууанчны.

Олду санланы учургъан балхам,
Эсинги, кесинги буруб онгнга.
Сенден да юлгю алырча адам,
АЛЛАХ бурур сени сууаб джолгъа.

Харамдан тыйыл, билиминг джетиб,
Сыйлы болурса толуб сууабдан.
Аманлыкъны кьурут, джибин кесиб,
Огъурлулукъ кюню тийиб башынгдан.

Тюз иннетинги кючу боркъулдай,
Сезиминг джайылыр джер юсюне.
Билимингде чокъуракъ шоркъулдай,
Сени тюз элтир, иймез чюйресине.



ОЛ БИЗНИ КЁРЕД

Тилек тилеб, АЛЛАХХА баш урсакъ,
Бел бюгюб, тобукъланыб турсакъ.
Эс ийиб, таукел кюрешсек,
Джууаблылыкъны терен сезсек.

Сезим бёлмей, махтаула берсек,
Ангыны тюзюне ишлетсек,
Рахат болур тюнюбюз, тюшюбюз,
Алгъа барыр тутхан ишибиз

Уллу АЛЛАХ аллайны суюд,
Излегеннге джарыкъ джол беред.
Биз аны кёрмейбиз, Ол бизни кёред,
Кече да, кюн да, неге да ёред.



СУУАБ ХАЗНА

Джюрегингде иман кючлю орналса,
Джукъланмай джаннган джилтинден толса.
Ашхы умутла сеннге къонарла,
Сууаб базманынга юлош къошарла.

Кенг дунияны чомарт джарытсанг,
Шайтанны, джинни, буууб къарылтсанг,
Иманынг бегиб, мийик ёрлесенг,
Чулгъаннган булутну чачыб тебресенг,

Къолунгу узатсанг келген онгсузгъа,
Джолун тубан басхан къарыгусузгъа,
Аджашхан инсанны тюзюне бурсанг,
Бир джарлыгъа дагъан болуб турсанг,

Аллай адам барлыкъды тюз джолда,
Аны насыбы чомарт къолунда.
Ол АЛЛАХДАН уллу саугъа алыр,
Сууаб базманына харакет салыр.



УЯЛЫУ

Уялгъан аманлыкъдан тыйылад,
Нюр ура джарыкъ кёзлеринден.
Ол динни джоругъуна сыйынад,
Джылыу тёгюле сёзлеринден.

Уялчакълыкъ нюр кючдю, аламат
Тамашады, тазады чыкъдан.
Ол хаман игиликге чакъырад,
Тыяд адамны аманлыкъдан.

Уялчакълыкъ нюр туугъандан келед,
Джюрекде тау тёппеча, мийик.
Адамгъа джарыкъ сезимле беред,
Бегийд, джюрекни кылына тийиб.

Уллу АЛЛАХХА бек бойсунуудан
Уялчакълыкъ адамгъа сингед.
Тирилиуден, сейир учунуудан,
Анга уялыу насыб къанат беред.

Уялчакълыкъны тамыры намысд,
Тюз иннетлилик, ашхы адет.
Ишленмеклик, джарашыулуку сабырд,
Бек кертилик, иман, берекет.



НАСЫБ БЛА ДЖЕТ

Ишинги огъур бла сен,
АЛЛАХ айтса деб, башла,
Иннетинги этиб тюз, кенг,
Тюзлюк джолунда джашна.

Ёксюзге иги болсанг,
Сууаблыкъ сеннге джетер.
Азыгъынгдан ашатсанг,
Кёб гюнахларынг кетер.

Таурух тангында олтур,
Джер джюзюне сагъыш эт.
Сууаб хазнангы толтур,
Ахыр кюннге насыб бла джет.



КЪЫЯМАТ КЮН

Заман джетсе адамланы
АЛЛАХ барын ёлтюрюр.
Ол тирилтиб инсанланы,
Къыямат Кюн кёлтюрюр.

Чириб бошалгъан саннга,
Эт да, тери да къонар.
Джаны кириб инсаннга,
Къаны джюрюб, терк къобар.

Ол заманда мында этген,
Ишлерине эс бёлюр.
Букъу тенгли игилигин,
Аманлыгъын да кёрюр.

Тюзлюкню кюню келиб,
Ары джарлы, бай джетер.
АЛЛАХ тыйыншлысын бериб,
Хар къулуна сют этер.

Къарыусузгъа джакълыкъ болуб,
Залимге дерт къайтарыр.
Аны азабдан толтуруб,
Отда къанын къайнатыр.

Иманларын тутханлагъа,
АЛЛАХ сый, саугъа берир.
Керти джолда баргъанлагъа
Джандетни эшигин керир.



ТЮШЮНЕЙИК

Баш урабыз АЛЛАХХА,
Бойсунабыз Патчахха
Деб, биреуле бир-бирде
Элде, орамда, юйде

Айталла, алдаб, хапар,
Тынгылайды эл, сахар.
Учад ётюрюк джели,
Болгъан кибик биз тели.

Кече, кюн да, гырылдаб,
Джашайла халкъны алдаб.
Аллай гюнахлы болад,
Шайтандан, джинден толад.

Керти ийнаннган, бойсуннган,
Бир АЛЛАХХА баш ургъан,
Къутхарыр ючюн джанын,
Шагъатсыз бюгер санын.

Къоймай этер намазын,
Узакъ иимей заманын.
АЛЛАХХА къуллукъ этер,
Джандет тёрюне джетер.



СЁЗЧЮ

Сууаб джолдан ол кетиб,
Шайтаннга тенг болады.
Биреуню сёзюн этиб,
Сёзчю гюнах алады.

Тюз тургъан тиширугъа,
Ат-бет айтыб, кюледи.
Таяныб сёз буруугъа,
Джалгъан сёзню сюреди.

Чайкъайды джерни юсюн,
Уудан толуб, алынад.
Терс атлагъаны ючюн,
Гюнах саугъа тагъылад.

Нёгери шайтан болуб,
Халкъгъа заран салады.
Гюнах къабчыгъы толуб,
Терсейгенлей барады.



АЛДАННГАНЛА

Ол байлыгъын кёб этед,
Ёксюз хакъны ашайды.
Рысхыгъа терен киред,
Джагъым излеб джашайды.

Кече, кюн сагъыш этиб,
Терс акъылны къурады.
Раббийден узакъ кетиб,
Шайтаннга айланады.

Ол терсеед, АЛЛАХХА
Берген сёзюн бузады.
Рысхыгъа эм ачхагъа,
Алданыб, баш урады.

Бурулад кир иннетинде,
Эшитмейд къулакълары.
Джандырырла джаханимде,
Отун болуб, гюнахлары.

Алайды да, АЛЛАХХА,
Керти болуб баш урайыкъ.
Олд аламны Патчахы,
Сыйлы къулу болайыкъ.



КУКА БЕТИ ТЮЛДЮ ТАЗА

Джуртун, халкъын, динин сатхан,
Тилини хазнасын ойгъан,
Дунияда сыйлы болмаз,
Насыб бюртюк табалмаз.

Ол къыйынлыкъ, азаб кёрюр,
Джаны саулай джарты ёлюр.
Джюрек кёзю джукъланыр,
Бушуу аугъа булгъаныр.

Этеди шайтан айтханны,
Билмейд тобагъа къайтханны,
Джашайд налат, имансыз,
Ашайт харамны антсыз.

Толмайд сууаб сагъышладан,
Керид инсан дараджадан,
Кука бети тюлдю таза,
Джюреги уа кюлдю къара.



ЗАРЛЫКЪ

Тынчлыкъ табмайды зарлыкъ,
Уу кѣз биреуге джетед.
Кир иннет, джюрек тарлыкъ,
Кѣбге аманлыкъ этед.

Ол барады, къутуруб,
Джетген джерин къаралта.
Сууаблыкъны унутуб,
Тийрелени таралта.

Зар иннет бла джашагъан
Халкъны этеди мыдах.
Тюзню хакъын ашагъан
Алады уллу гюнах.

Тутма биреуге зарлыкъ,
Аман ишден кери бол.
Кетсин дуниядан тарлыкъ,
Чомарт болсун джюрек, къол.



ТЕРСЕЙГЕНЛЕ

Сыйны, намысны атханла,
Керти динлерин сатханла,
Ибилис бла этелле ашау,
Имансыз, хылы-мылы джашау.

Джюрюйле, хауле айлана,
Зарлыкъ бла къаты байлана,
Тутуб терсликни аркъанын,
Джерлеб шайтанны тарпанын.

Аланы харамд ашлары,
Кёзлерин джабад къашлары,
Дуния кёрюнед алагъа ау,
Ахыратлары да болады шау.

Харам хакълыды къоллары,
Чалышлыд тутхан джоллары,
Тюзлюкню унутуб ала,
Ишлейле гюнахлы къала.

Ала отлада джанарла,
Азаб суулада батарла,
Бир АЛЛАХ нени да кёред,
Тюзлюк тутхан керти тёред.



ТЁРТТИЗГИНЛЕ

Сен ашхылыкъны тёрюне джетмесенг,
Этген хазнанг аманлыкъ этерикди.
Ёксюзге, онгсузгъа юлюш этмесенг,
Бютеу рысхынг зырафха кетерикди.

* * *

Джашауунгу зауукълукъ излеб ётдюрсенг,
Намысны, уятны, акъылны тас этсенг,
Сууаб базманынга сен не саллыкъса,
Ахыр кюнде биргенге нени аллыкъса?

* * *

АЛЛАХ буюргъанча джашагъан насыбды,
Башхаланы ол керти джолгъа тартыр.
Аллай адамны къууанч басыбды,
Ол Къуран кергюзгенча этгенлей барыр.

* * *

Джерге ариулукъ бере, сейир гюлле чагъалла,
Чапыракъдан чыкъ тамчыла, кюмюш чача, агъалла.
Алтын Кюнню таякълары, нюр себелле, баталла,
Чууакъ кёкден мийикден, джулдузла кёз къысалла.

* * *

Малкёзле, мыйыларын кьурутуб,
Джашауларын джутлукьгъа бардыралла.
АЛЛАХНЫ, динни да унутуб,
Ёмюрлерин аман бла ашыралла.

* * *

Меджгитге джеталмагъан, узакъ болуб,
Терен сезиб, намаз этер джер-джерде.
Джерни юсю джарыгъанд, кьууанч толуб,
Халаллыкьгъа, муслиманнга, меджгитге.

* * *

Боранлатыб, биреулен сени сёксе,
Аны джюрек тамыры терк кирленир.
Сенде болгъан, болмагъандан хапар берсе,
Сеннге аны сууаблыкь тёрю келир.

* * *

Ислам дин бла байланмагъан джюрекден,
Ол муслиманлы болмаз.
Ёгюз ётмегенча ийне тешикден,
Джандет эшикден киралмаз.

* * *

Файгъамбарны, имамны айтханын
Биз буйрукъ халда билейик.
Ала кёргюзген тюз джолдан таймай,
Джандетге терен кирейик.

* * *

Сен сабырлы, дамлы болуб,
Сууаблыкъдан керилирсе.
Кечсенг, джарыкъ нюрден толуб,
АЛЛАХ суююб, кечилирсе.

* * *

Зорлукъ джетген адамны,
Джыламугъу АЛЛАХХА терк джетеди.
Тилеги, ахсыннганы,
Анга джууаб, болушлукъ бериледи.

* * *

Сабырлыкъны ауазына тынгылай,
Эркишини тюзетген билимиди.
Рахатлыкъны сейир булбулу джырлай,
Аны бютеу ариулугъу тилиди.

* * *

Аятланы кери этгенни
Унукъдургъан кюч тутар.
Самаркъаугъа джетдиргенни
Бедишлик азаб джутар.

* * *

Къуран тюз джолну тутад,
Дуниягъа джарыкъ тегед.
Аманлыкъны къурутад,
Сёзю бла насыб беред.

* * *

Билирге излегенинги,
Бир АЛЛАХХА сорурса.
Керти оноугъа сыйыныб,
Сен тюзлюкню къорурса.

* * *

Уллу АЛЛАХ чырт кечмейди,
Анга къошакъ этгенни.
Ата-ананы джылатыб,
Ташагъа секиргенни.

* * *

АЛЛАХХА баш ургъанны,
Ол джандет джолгъа бурур.
Шайтаннга байланнганны,
Джаханим отха урур.

* * *

Кёкню сейир, чууакъ этиб,
Анда джулдуз джаратхан
Бир АЛЛАХДЫ, джылтыратыб,
Аны бизге къаратхан.

* * *

Муслиманла, джол къоратыб,
Меджгитлеге терк джетелле,
Тилек тилеб, намаз къылыб,
АЛЛАХХА къуллукъ этелле.

* * *

Къураннга ийнаннганны,
Кёб аман заты кетер.
Ол, сууаблыкъдан толуб,
Сыйлы джандетге джетер.

* * *

Бек аманды ишлери
Тилчилени, билселе.
Эки адамны джау этиб,
Шайтанны кюлдюрселе.

* * *

Къулуну джыйгъан хазнасын,
АЛЛАХ Хукму Кюн ашатыр.
Бу дунияда ызына,
Ол Къыяматдан къаратыр.

* * *

Сыйлы АЛЛАХ тилейбиз,
Сакъла бизни къаугъангдан.
Сууаб джашау излейбиз,
Къуру къойма саугъангдан.



АЛАХНЫ КЪУДУРЕТЛИ

АЛЛАХНЫ 99 АТЫ

Аллах, Ачыкъ, Хатерли,
Дайымлыкъ, Джаратыучу.
Кючю Кёб, Деменгили,
Деу, Тюз Джолгъа Салыучу.

Бий, Къудуретли, Кертичи,
Джашау бла Саугъалаучу.
Бай, Хапарлы, Биринчи,
Ие, Кечиб Къоюучу.

Уллу Кючню Джюрютген,
Тёре, Шыйых, Рахатлыкъ.
Нюр, Махтаулу, Акъылман,
Мийикликни Тутхан, Хакъ.

Намыслы, Хайыр бла Саугъалаучу,
Чыгъарыучу, Махтаучу.
Эм Мийик, Байындырыучу,
Джангыз, Тамам, Къураучу.

Тюрленмеучю, Кечиучю,
Джакъчы, Унукъдуруучу.
Не затны да Кёрюучю,
Къалайда да Болуучу.

Ахыргъы, Тюзетиучю,
Джан Алыгучу, Джыйыгучу.
Кечмеклик Бериучю,
Сабыр, Махтауну Тутуучу.

Джити Акъыллы, Къоруучу,
Таша, Халал, Тергеучю.
Шагъат, Джан Аурутуучу,
Тирилтиучю, Суююучю.

Кенгигертиучю, Къысхартыучу,
Ёлюмсюз, Эсгериучю.
Джумушакъ, Саугъалаучу,
Аламат, Бюсюреучю.

Тёзюмлю, Кюч Иеси,
Артха Тебериучю.
Неда къолундан келген, Дерт Иеси,
Эслеучю, Сыйсыз Этиучю.

Заран Салыгучу, Тыйыгучу,
Ёмюрлюк, Кюч Бериучю.
Шох, Насыблаучу,
Игилик Юлешиучю.

Уллу, Аламла Патчахы,
Не затны да Билиучю.
Этиучю, Тереке Иеси,
Нени да Эшитиучю.

Игилик Бериучю
Махтаугъа Тыйыншлы.
Ышангылы, Сакълаучу,
Башлаучу, Ашатыучу.

Къайтарыучу, Тюзлюкчю,
Онглу, Алгъа Чыгъарыучу.
Тобаны Къабыл Этиучю,
Ехтем, Джазыкъсыныучу.



МАХТАУЛУ

АЛЛАХ бирди – Хатерли,
Дайымлыкъ, Джаратыучу.
АЛЛАХ бирди – Хурметли,
Кючю Кёб, Къайтарыучу.

АЛЛАХ бирди – Къудуретли,
Шох, Тереке Иеси.
АЛЛАХ бирди – Бегимли,
Тёзюмлю, Ашатыучу.

АЛЛАХ бирди – Рахматлы,
Шыйых, Хакъ , Джан Салыучу.
АЛЛАХ бирди – Сабыр, Деу,
Ие, Джерни Джазыучу.

АЛЛАХ бирди – Чыдамлы,
Тёре, Дерт Къайтарыучу.
АЛЛАХ бирди – Намыслы,
Ачыкъ, Байындырыучу.

АЛЛАХ бирди – Тюрленмеучю.
Уллу Кючню Джюрютген
АЛЛАХ бирди – Махтаулу,
Неда къолундан келген.

Хакъ - керти, тюз.

АЛЛАХ бирди – Кечиучю,
Джакъчы, Унукъдуруучу.
АЛЛАХ бирди – Этиучю,
Къалайда да Болуучу.

АЛЛАХ бирди – Сакълаучу,
Хайыр бла сауғалаучу
АЛЛАХ бирди - Къураучу,
Ахыргъы, Тюзетиучю.

АЛЛАХ бирди – Къоруучу,
Акъылман, Ёлтюрюучю.
АЛЛАХ бирди – Джыйыучу,
Ёмюрлюк, Эшитиучю.

АЛЛАХ бирди – Тергеучю,
Бай, Керти, Къысхартыучу,
АЛЛАХ бирди – Сюйюучю,
Шагъат, Джан Аурутуучу.

АЛЛАХ бирди – Башлаучу,
Ёлюмсюз, Алапат, Эсгериучю.
АЛЛАХ бирди – Къураучу,
Аламланы Патчахы, Бюсюреучю.

АЛЛАХ бирди – Кюч Иеси,
Артха Тебериучю.
АЛЛАХ бирди – Дерт Иеси,
Сыйсыз Этиучю.

АЛЛАХ бирди – Деменгили,
Халал, Насыб Бериучю.
АЛЛАХ бирди – Кенгнгертиучю,
Кечмеклик Бериучю.

АЛЛАХ бирди – Кюч Бериучю,
Игилик Юлешуучю.
АЛЛАХ бирди – Тирилтиучю,
Дуниялада эм Мийик.

АЛЛАХ бирди – Махтаучу,
Тобаны Къабыл Этиучю.
АЛЛАХ бирди – Насыблаучу,
Хар не затны да Билиучю.

АЛЛАХ бирди-Асыраучу,
Махтауну Тутуучу.
АЛЛАХ бирди – Саугъалаучу,
Не затны да Кёрюучю.

АЛЛАХ бирди – Эшитиучю,
Мийикликни Тутхан.
АЛЛАХ бирди – Билдириучю,
Ышангылы, Эслеучю.

АЛЛАХ бирди – Джангыз, Уллу,
Игилик Бериучю.
АЛЛАХ бирди – Тыйыучу,
Онглу, Харам Этиучю.

АЛЛАХ бирди – Тюзлюкчю,
Бий, Алгъа Чыгъарыучу.
АЛЛАХ бирди – Биринчи,
Чомарт, Джазыкъсыныучу.



АЛЛАХНЫ БЕК АЛАМАТ АТЛАРЫ

АЛЛАХ дейбиз, Анга джокъду ушаш,
Лагъымлыд, кючю уллуду джууаш.
Люуюлдемеген бирди, кёрюнед,
Аны эси хар затха бёлюнед.
Хорланмазлыкъды, бизни сагъайтад.

ХАТЕРЛИ аллын бурады, кёред,
Хар ийнанганнга, чомарт кюч беред.
Джанланы толусу бла иманлайд,
Хатер этиучю ачыуун хорлайд.

ХАЛАЛ адамгъа кемсиз къайгъырад,
Терен акъыллаб, сый бла толтурад.
Ол зат Аны айбатлы джылыууд,
Бизге берген махтаулу турууд.

ИЕ кёклеге, джерге да джетед,
Андан патчахлыкъ, башчылыкъ келед.
Оноучулукъда джангызлыкъ сакълайд,
Излегенин этед, суйгенин джакълайд.

ШЫЙЫХ кемликден, айыбдан, керид,
Кертид, ишексизд, сыйлылыкъ джерид.
Аны билсек, тазаларбыз акъыл,
Кёлден кетермей болурбуз такъыл.

РАХАТЛЫКЪ джаяд мамыр уясын,
Джан насыблы кёрюрча дунясын,
Иши игиди, ашхылыкъ чыкыгъан,
Керид джангылычдан махтау айтылгъан.

ЫШАНГЫЛЫ хар сёзюне толуд,
Кертиликни кючю иннетид, джолуд.
Адамгъа Ол буюрад джазыуун,
Азабдан сакълайд джанын, къарыуун.

САКЪЛАУЧУ башчылыкъны джюрютед,
Хар ишни эсеблеб, къараууллукъ этед.
Билген бюсюреу этиб джарыр,
Аны бек багъалатыргъа талпыр.

КЮЧЮ КЁБ олду бегиб тургъан,
Дуня джашар ючюн эсин бургъан.
Болушлукъ излемеген кюч керед,
Кимге да керекли олду къудурет.

ЁХТЕМ нюр кесине бойсундурад,
Бийликни, оноуун къолунда тутад.
Джаратхан затына айтханын этдиред,
Бой салдырыб ёлюмге джетдиред.

ОНГЛУ неден да сыйлыд хар заман,
Джангыз тутад алапатлыкъ тамам.
Андад толу онглулукъ кече, кюн,
Азаб басар сезмегенни юсюн.

ДЖАРАТЫУЧУ сейир джашау ишлейд,
Джокъну джаратыб, зат этиб кючлейд.
Анга ол тынчды, бол! десе, болад,
Джанны джазыуун белгилеб, салад.

ЭТИУЧЮ хар затны джаратханд бютюн,
Кючюнде Аны джарыкъ тиед Кюн,
Болушлукъ Анга чыртда керек тюлд,
Къурауу чагъыб тургъан джарыкъ гюлд.

КЪУРАУЧУ берген тюрсюнюн сакълайд,
Хар зат, Ол чертген ауаз бла джырлайд.
Сынаб сейирлик дарман азыгъын,
Алапат кёрюб алам джарыгъын.

КЕЧИУЧЮ адамны гюнахын кечед,
Кемлигин кетериб, хурметли этед.
Ол джангыз бирди, кечмеклик ийген,
Анга баш ургъан къулун бек суйген.

КЮЧ ИЕСИ неге да джетишед.
Ол хорлаучу эм онглаучу төред.
Игилиги дуниялада барад,
Уллу хорламыны гюлю чагъад.

САУГЪАЛАУЧУ хар кьулун саугъалайд,
Ызына излемейди, сыфатлайд.
Акъыл бергенд, нюр урурча кёзюнден,
Кертини айыырча ётюрюкден.

АШАТЫУЧУ берген нюр джагъалыд,
Джерде джанлагъа бек багъалыд.
Ашарыкъ, кийим, юй турмуш тогъум,
Ийнаныу, ангы, эс, билим согъум.

НАСЫБЛАУЧУ ташаны ачыкълайд,
Хатадан сакълаб, адамны ийнакълайд.
Насыбны, билимни кючюн ачад,
Ийнанганлагъа джарыкъ нюр чачад.

НЕ ЗАТНЫ ДА БИЛИУЧЮ билимлид,
Озгъаннга, боллукъгъа да кёрюмлюд.
Аны билими теренди, учсузд,
Тюрленмей тургъан кючдю, кыйырсызд.

КЪЫСХАРТЫУЧУ тюзлюгон кёргюзед,
Бирлеге насыбны аз этиб беред.

Джан тыяд, ёлюмге бой салдырад,
Джюреклерин билдирмейин тохтатад.

КЕНГНГЕРТИУЧЮ игилик табдырад,
Берирге сюйгенин зауукъландырад.

Чомартлыгъы бла къууандырад,
Джаратхан джанына джашау ачад.

СЫЙСЫЗ ЭТИУЧЮ мугурландырад,
Анга сыйынмагъанны унукъдурад.

Хыликкелик этед, ыйлыкъдырад,
Аллайланы ол учузландырад.

МАХТАУЧУ джарыкъ, джылыу иед,
Анга баш ургъанны сыйын кёлтюред.
Болумун ашхылаб, сейир хыйсаблайд,
Мамырлыкъ, тамашалыкъ да къурайд.

КЮЧ БЕРИУЧЮ юлешиб туурадан,
Къууандырады рахат джашаудан.

Джарсыу къоратыб, береди хорлам,
Мийик болум бла этеди байлам.

УНУКЪДУРУУЧУ төбен къаратад,
Кимни болса да кыйнайды, сарнатад.
Сыйсыз тюшюрөд энишге тахтадан,
Мадарсыз этиб, кетерөд къадардан.

НЕНИ ДА ЭШИТИУЧЮ сезиулөд,
Кёкледе, джерде уллу фахмулуд.
Ангылауу къалайгъада джетөд,
Тауушланы бирча, бирге эшитөд.

НЕ ЗАТНЫ ДА КЁРЮУЧЮ бек билөд.
Джашырылгъанны, ачыкканы кёред.
Тюрленмейд кёрюую, ёмюрлюк байд,
Толулуккыну гюлю Аны джасайд.

ТЁРЕ эм уллу, эм мийик сюдюд,
Аламны аулагъан хакъ керти кючюд,
Джангызд тюзню, ётюрюкден айыргъан,
Сюдюлюк кючюн кенгнге джайгъан.

ТЮЗЛЮКЧЮ адилсизликден^{*} тазад,
Эркинлик бермейд, ол затдан тыяд.
Ийнанмагъанлагъа да тюзлюк тутад,
Керти къулларына бек къайгырад.

^{*} Адилсизликден – тюзсюзлюкден.

ДЖИТИ АКЪЫЛЛЫ аламгъа бѣлюнед,
Этиуюнде чомартлыгъы кѣрюнед.
Адамдан хыянатны кетеред,
Къулуна керек насыб джетдиред.

ХАПАРЛЫ эслемей къоймайд бир зат,
Таша умутланы билед аламат.
Кѣкледе, джерде зинг бугъунган,
Ол билмеген джокъду джашырылган.

САБЫР эслесе буйрукъдан джанлагъан,
Тынгыламаган, этмейин къойган.
Ашыкъмайд айыбына тюбетирге,
Мадар беред анга тюзелирге.

УЛЛУ хурметлид, зат джеталмазлыкъ,
Тамам махтаулуд ол, аламатлыкъ.
Ангыларгъа Аны керти болумун,
Чырт къарыу джокъду бар онглулугъун.

КЕЧМЕКЛИК БЕРИУЧЮ джаратханын
Джазыкъсынад, кечеди гюнахын.
Тыяды аны аман этиуден,
Джангылгъандан, терсине кетиуден.

БЮСЮРЕУЧЮ игиге разы болад,
Аны ючюн этилген ишлени алад.
Джылы кьолун кьулуна узатад,
Гюнахын кетериб, рахат джукьлатад.

ЭМ МИЙИК уллуду, бек кёлтюрюлген,
Тамам сыйлыды махтау берилген.
Кьошакь этилгеннге тюлд ушагьан,
Толулукь болум олду кьурагьан.

БИЙ дараджасы бла кимни да озад,
Уллу кючюне, кьудуретине базад.
Аламатлыгьы, кьарыуу толуд,
Джангыз тургьаны махтаулу джолуд.

КЬОРУУЧУ олд хар затны кьурагьан,
Сакьлагьан адамны кьаратхан.
Джерни башында кёклени тутхан,
Тенгизни, океанны айыргьан.

ИГИЛИК ЮЛЕШИУЧЮ сакьлайд дуниясын
Адамны эслеб ишин, уясын.
Эсеблеуню керед кьанатларын,
Аш бла баджарыб ол джаратханын.

ТЕРГЕУЧЮ кѣулуна игилик этед,
Ангылауу бла тюз багѣа беред.
Ёмюрлюк Аны батмаз джарыгъыд,
Аламат этиуу тамамлыгъыд.

МАХТАУЛУ керти кѣарыугѣа Иед,
Хар бир ишини кюню нюр тѣгед.
Керид кемликден, джетмеген затдан,
Тазады кѣаяулукъдан, бузукъдан.

ДЖУМУШАКЪ халалд, чомартлыгъы учсузд,
Сѣюне толуд, саугѣасы уллуд.
Анга таяннганны кѣуру да джакълайд,
Аны онглулугъу тюрленмей джашайд.

ЭСЛЕУЧЮ кѣулларын ызлайды бек,
Аланы кѣреди, эшитеди терк.
Ол эслемеген бир зат да кѣалмаз,
Кѣкледе, джерде чырт бугъуналмаз.

ДЖАН АУРУТУУЧУ адамгѣа кѣайгъырад,
Тилекчилеге джууаб кѣайтарад.
Табдырад кѣулуна излегенин,
Эс бѣлюб, береди тилегенин.

КЪАЛАЙДА ДА БОЛУУЧУ барын аулайд,
Хар магъананы Ол тынч ангылайд.
Ангыламакълыгъы, билими төред,
Саулай дунияны эшитеди, кёред.

АКЪЫЛМАН бек акъыллылыгъындан,
Къурайд, буюрад тыйыншлылыгъындан.
Билед хар нени ич магъанасын,
Дунияда кёргюзед билим хазнасын.

СЮЙЮУЧЮ къулларын учундурад,
Сюймеклик бла байлаб къууандырад.
Джюрекге төгеди насыбны сырын,
Этдиред, таза, татлы сагъышын.

АЛАМАТ мийик махтаугъа Иед,
Къолунда кючюнден дуниягъа бюркед.
Тауусулмай турад Анда ашхылыкъ,
Игилик, насыб, толу рахатлыкъ.

ТИРИЛТИУЧЮ ашхы кюч бла тиед,
Къулларына келечиле иед.
Джанны затын джангыртырыкъды бютюн,
Тирилтирикди Ол Къыямат Кюн.

ШАГЪАТ адамны хар ишин тутад,
Кёред, баш шагъат къайда да болад.
Ол къуллаарына тюзлюк сюдюд,
Хукму Кюн оноу этерик кючюд.

ХАКЪ* тюзлюкню толусун джюрютед,
Хар сёзю кертиликни бегитед.
Андан чыкъгъан тюзлюкдю, ийнакълайд,
Тохтаусуз джарыб, джылы къучакълайд.

ДЖАКЪЧЫ ышанмакълыкъны разылайд,
Ийнаннганны терсейтмейд, джакълайд.
Анга ышаннганнга иед игилик,
Къууандырады, беред тирилик.

НЕ ДА КЪОЛУНДАН КЕЛГЕН къарыулуд,
Дженгилиуню билмейди, хорлаулуд.
АЛЛАХДАН башха джокъду кюч, къудурет,
Ол дунялагъа ёмюрлюк Иед.

ДЕУ этгенча, хар не да болад.
Сейир хурметини алтын кюню чагъад.
Джокъду тебдирлик аны орнундан,
Бийликни алаллыкъ сыйлы къолундан.

*Хакъ - керти, тюз.

ШОХ ол, сюеди кьуллерын,
Дженгилтед, тынч этед болумларын.
Кьууаныр Анга толу ийнаннган,
Алакат джоругъуна бойсуннган.

МАХТАУГЪА ТЫЙЫНШЛЫ дунияны тутад,
Богъан махтау, сый да джангыз Ангад.
Уллу алакат, сейирли атларыд,
Игилигид, буйругъуд, тыйгычларыд.

ЭСГЕРИУЧЮ нени да ангылайд,
Билими бла дунияны аулайд.
Толу кёред Ол, билед, эсеблейд,
Хар затны ахырын белгилейд.

БАШЛАУЧУ онглуд эм алгъа чыгыч,
Бергенд не тукъум затха башланнгыч.
Ишексиз нени да Ол джаратханд,
Сейирлик дуниягъа кьаратханд.

КЪАЙТАРЫУЧУ джашаб тургъанны сау
Ёлюмге бурад, этиб аны шау.
Къыямат Кюн алагъа джан саллыкъды,
Тирилтиб, джашаугъа кьайтарлыкъды.

ДЖАШАУ БЛА САУГЪАЛАУЧУ кючюн керед,
Бир-бир кьулларына узакъ ёмюр беред.
Этгенд джаратхан затын кьурудан,
Ёлтюрюб, дагъыда сюер джангыдан.

ДЖАН АЛЫУЧУ ёлюм айыргъанд,
Ёлюмлюлеге аны буюргъанд.
Кесини кьулун ёлюм бла басад,
Джанын къачан, къалай суйсе алад.

ЁМЮРЛЮК хар заманда джашаучуд,
Аламатдан, сейирден къараучуд.
Болгъанды, барды, боллукъду дайым,
Къуру да кючю аламгъа джайым.

ЁЛЮМСЮЗ тутад бийлик байрагъын,
Кеси джукъ излемей беред джарыгъын.
Джаратхан затларына къайгъырад,
Асыу этиб, болушлукъ табдырад.

ТАМАМ байды, андады ариулукъ,
Аламы джасагъанд, этиб таурухлукъ.
Аны себеби бла дуня бурулад,
Тас болуб къалмай, джарыйд, учунад.

НАМЫСЛЫ аламатлыкъдан толуд,
Сейирлик, иги тамаша джолуд.
Джюрекдени насыбха батдырад,
Джомакълы, ариу тангла атдырад.

ДЖАНГЫЗ джюрютеди чексиз бийлик,
Аныча болургъа джетмейд себеблик.
Баш уругъа тыйыншлы алай болгъан,
Джокъду оноу этиб, ёмюрлюк тургъан.

ТЮРЛЕНМЕУЧЮ ол хар замандагъыд,
Бойсундурад богъанны, хамандагъыд.
Тамам кертиди барыб тохтагъан,
Андан излегенни терк джокълагъан.

ДЕМЕНГИЛИ заманны бурады, тулпард,
Кюнню тийдириб, джерни джарытад.
Суйсе болдуруб, къуарарыкъды токълукъ,
Излесе, аны этерикди джокълукъ.

КЪУДУРЕТЛИ бир-бир къулларын кючлейд,
Аланы сынайды бек деменгилейд.
АЛЛАХ бермегенни адам табалмаз,
Насыбха, игиликге да джеталмаз.

АЛГЪА ЧЫГЪАРЫУЧУ тартад сагъайтыб,
Сууаблаб, алгъа элтед къадалтыб.
Излегенине эркин бериучюд,
Чомартлыкъ, байлыкъ да кёргюзючюд.

АРТХА ТЕБЕРИУЧЮ олду къадар,
Арлакъ тюртеди, табдырмайд мадар.
Къулун къысады, билдиред кесин,
Аны сыйсыз этиб кетеред эсин.

БИРИНЧИ хар зат къуралгъынчы болуб
Тургъанды АЛЛАХ, Аны кючю толуб.
Анга дери болмагъанд джукъ, ол аллыд,
Джаратылгъанны Иесид, Патчахыд.

АХЫРГЪЫ мийик джашатад кесин,
Ол артдагъыд, эшитдиред сёзюн.
АЛЛАХ джангызды, кесид джан салгъан,
Аджаллыд бары да Андан къалгъан.

АЧЫКЪ кёб, керти затда кёрюнед,
Хурмет, ашхылыкъ, суймеклик беред.
Тюзлюк джолунда сууаб бурдурад,
Къутхарлыкъ билим тауда турдурад.

ТАША аламда кѳргюзед ышан,
Джаратхан джанына салгъанды джан.
Кѳрюнмесе да дуняда ачыкъ,
Белгиленелле шартлары джарыкъ.

АЛАМЛА ПАТЧАХЫ тутад бийлик,
Хар неде оноучулукъ, эркинлик.
Излегенин джашауда толтурад,
Терен акъылы бла ишин бардырад.

МИЙИКЛИКНИ ТУТХАН бек тазад,
Иелик джюрютед, джерни джазад.
Аны сыйы мийикди, алапат,
Нюрлю джарыгъы кенгнге джайылад.

ТОБАНЫ КЪАБЫЛ ЭТИУЧЮ кѳред,
Къулуна ѳкюнюрге мадар беред.
Мюкюл боллукъгъа суюуб болушад,
Аллайны кечиб, тобасын алад.

ДЕРТ ИЕСИ хыйланы унукъдурад,
Харамны айыбына джолукъдурад.
Тобагъа къайтмагъанны инджилтед,
Гюнахлыланы, къыйнаб джюрютед.

КЕЧИБ КЪОЮУЧУ кѣулуна кѣарайд,
Гюнахын кечиб, аны сыйын сакѣлайд.
Джаратхан джанын ариулайд, тазалайд,
Уллу игилиги дунияны аулайд.

ДЖАЗЫКЪСЫНЫУЧУ кѣарамайд огѣартын,
Джаяд джылы тылпыуун, кѣууатын.
Тилекчини гюнахларын кѣурутад,
Аны игиликде, насыбда тутад.

УЛЛУ КЮЧНЮ ДЖЮРЮТГЕН бирд, джангыз
АЛЛАХДЫ патчахланы патчахыд.
Кесид нени суйсе, аны этген,
Тыйгъычсыз муратларына джетген.

МАХТАУНУ ТУТУУЧУ уллуд, айырмад,
Халалды, онглуду, сейир аламат.
Кючлюдю, тюзлюдю, джарыкѣды, сыйлыд,
Сау дунияда махтаугѣа тыйыншлыд.

КЕРТИЧИ туудурады кертисин,
Тюзлюк бла джарытады джерни юсюн.
Зулму этиучюге дерт кѣайтарад,
Кѣысылгѣанны азатлаб, кѣууандырад.

ДЖЫЙЫУЧУ богъанны чакъдырад,
Уллу Кюннге хар затны бардырад.
Джан салыр тургъузтур, тирилтир,
Ол сюд этерге джыйыб элтир.

БАЙ харакетлид, толуд, хазналыд,
Бек игид, айыбсызд, алапатлыд.
Къулуна джашауунда насыб беред,
Хар джаннга тыйыншысын кёргюзед.

БАЙЫНДЫРЫУЧУ тамам рысхылыд,
Сюйгенине ииген нюрю джылыд.
Ол берсе, адамгъа барад джарыкълыкъ,
Юсюнде ёседи, чагъад зауукълукъ.

ИГИЛИК БЕРИУЧЮ мийикликден,
Джаратханына беред игиликден.
Керти иннет, акъыл байлыкъ, саулукъ.
Эки дуняда – джашау турмушлукъ.

ТЫЙЫУЧУ уллу кюнню тутуучуд,
Кёб сынау затны тыйыб къоюучуд.
Къыйынлыкъладан деу кюнню сакълайд,
АЛЛАХ хар заман къулларын джакълайд.

ЗАРАН САЛЫУЧУ хыны атламын,
Кимге суйсе, бурад ачыу к̑арамын.
Андан сора джок̑ду онглу болаллык̑,
Башха биреуге заран салаллык̑.

ХАЙЫР БЛА САУГ̑АЛАУЧУ нюрюн беред,
Кесини к̑улуна хайыр джетдиред.
Ол бермесе, келмейди ашхылык̑,
Табылмайды тынчлык̑, мамырлык̑.

НЮР аламны джашау чыраг̑ыд,
АЛЛАХ – к̑клени, джерни джарыг̑ыд.
Суйген к̑улун тюз джолда бардырад,
Аны джанын, дунияны джарытад.

ТЮЗЕТИУЧЮ тюзетеди к̑улун,
Анга бериб насыбны толк̑унун.
Джюрегине к̑уяд ийнанмак̑лык̑,
Ак̑ылына салат бойсунмак̑лык̑.

ЧЫГ̑АРЫУЧУ джангызлай джаратад,
Таурухлу дунияны бизге к̑аратад.
Мисалсыз этиб, к̑ргюзед кючюн,
Ишлеб, джашнатады, джерни джюзюн.

ДАЙЫМЛЫКЪ турлукъду хаман джашаб,
Аны залимлиги дунияны байлаб.

Кючю хар заманда – чагъарыкъ гюлд,
Уллуду, хурметлид, тас боллукъ тюлд.

ТЕРЕКЕ ИЕСИ кертилей къалад,
Ёлгенни тюбюн ишексиз алад.

Дунияда хар зат бары къолундад,
Къуралгъан, джаратылгъан, Аны джолундад

ТЮЗ ДЖОЛГЪА САЛЫУЧУ тюз тюзетед,
Билим бериб, къулун юретед.

Ол саугъады адамгъа берилген,
Сууаблыкъ хазна болуб тёгюлген.

ТЁЗЮМЛЮ уллуд, ол бек чыдамлыд,
Джумушакъды, сейирди, сабырлыд.

Бойсунмагъанны кёреди, тёзед,
Хар нени да болджалы бла этед.



КЪУПЦХАРЫУНУ
НЮРЮ

ИМАНЛЫ ЭТ, Я АЛЛАХ

АЛЛАХ бизни джаратхан,
Тюзлюкню джолун юрет.
Джер юсюнде джашатхан,
Сууаб иште онглу эт.

Сен мени игиликде,
Бардыр, тюзге илешдир.
Джашауумда, ишимде,
Керти сёзле сёлешдир.

Мен излейме сууаблыкъ,
Ашхыландыр тилими.
Сен сездир джууаблылыкъ,
Билирча тюз диними.

Керти муслиман болуб,
Багъалатырча Сени.
Билим кючден толтуруб,
Эт иманлы Сен мени.

Юлюш бер деу кючюнгден,
Сакъларча кыйынлыкъдан.
Къаратдыр игиликден,
Саугъала рахматынгдан.

Хар кѳуру да Сен онг бер,
Сакъларча шайтан кючден.
Тѳгер киби к халал тер,
Кѳоркъмазча кѳыйын ишден.

Сыйлы кѳкледе, джерде,
Хатерлисе, Патчахым.
Сеннге суймеклик менде
Эт бек уллу, Я АЛЛАХЫМ.

Сеннге баш ургъанланы,
Гюнахларын кеч! Я АЛЛАХ.
Джазыкъсыныб аланы,
Джандетинге элт, Я АЛЛАХ. Амин!



ТЮЗЮНЕ БАРАЙЫКЪ

АЛЛАХДАН, кѣудуретлиден тилек тилейик,
Этген гюнахыбызгѣа туру кѣарайыкъ.
Бизни кѣурагѣаннга толу берилейик,
Кесибизни отдан, азабдан сакѣлайыкъ.

Баш уругѣа тыйыншлы Ол джангыз бирди,
Аны суйген чагѣад, джашайд, суйюнюб.
Аны кѣудурети ачыкѣды, кертид,
АЛЛАХНЫ кючю бизге турады кѣрюнюб.

АЛЛАХ, бизни джашат кѣыйынлыкѣдан сакѣлаб,
Ашхылыкѣны хар заманда тутарча эт.
Саугѣасыз кѣойма, тилейбиз, тур джокѣлаб,
Бизлени тюзетиб, толу иманлы эт.

Бири-бирибизге Сен бизни илешдир,
Тарлыкѣны, зарлыкѣны юсден узакѣ атдыр.
Кѣарнашлыкѣда, шохлукѣда тирилт, келишдир
Кѣызгѣанчлыкѣдан кѣутулт, халаллыкѣгѣа батдыр.

Кѣуранны, багѣалатыб, окѣургѣа берилт,
Тюз кѣулларынгы рахатландыр, тазалаб.
Кѣууанч тойну кѣанатын джюрекде керилт,
Бизни насыблы эт, хазнанг бла, алгѣышлаб.

Узакъда болсун бизден тарлыкъ эм аман,
Джашайыкъ сууаблыкъны таууна ёрлеб.
Джокъламасын бизни гюнахлы заран,
Хазыр турайыкъ сууаб садакъны джерлеб.

Динни хауасындан уртлайыкъ, солуюкъ,
Билим да алайыкъ, джюрегибиз толуб.
Сууаблыкъны чокъурагъындан тогъуюкъ,
Биз тюзюне барайыкъ, иманлы болуб.



Я АЛЛАХ, СЕН КЪУТХАР

АЛЛАХ, джарытсын деб, бизге
Нюр Кюнню къаратханды.
Уллу насыбха деб, бизге
Джерни да джаратханды.

Чыкъча, биз таза болайыкъ,
Ашыбыз табылады.
Разылыкъ бла да толайыкъ,
Джер бизге саугъагъады.

Тюзлюкню тутуб джашайыкъ,
Адамлыкъны къурутмай.
Сууаблыкъ таудан къарайыкъ,
Борчубузну унутмай.

Сакъланырча азабдан,
АЛЛАХХА баш урайыкъ.
Тазаланыб аман затдан,
Бюсюреулю турайыкъ.

Я АЛЛАХ, сакъла эрингенден,
Аманлыкъдан къаратмай.
Къоркъгъандан, джукъ этмегенден,
Акъыл кемден таралтмай.

Уллу сынаудан гызмардан ,
Я АЛЛАХ, кьутхар джарсытмай.
Дуниялада азабдан
Кьоруула бизни, кыйнамай.

Мухаммадны айтханларын
Эшитгенбиз, алгъанбыз.
Бизни ючюн къайгьыргъанын
Билиб, Сеннге къайтханбыз.



Гызмар - кьызгъанч

КЮЧЛЮДЮ, КЪУДУРЕТЛИДИ

Я АЛЛАХ, Сеннге баш урабыз,
Къураннга ийнанабыз,
Ислам динни биз тутабыз,
Мухаммадха бойсунабыз.

Раббийибизге къайтабыз,
Уллу махтаула айтабыз,
Сенден тилек тилейбиз,
Биз болушлукъ излейбиз.

Джашау керек табдыраса,
Рахат тёрде джатдыраса,
Сен джашыртынны кёресе,
Саулай дунягъа тёресе.

Бизге акъыл, кюч бересе,
Керти джолну кёргозесе,
Кёклеге, джерге Иесе,
Барыбызны бек сюесе,

АЛЛАХ бирди деб турабыз,
Бийибизге баш урабыз.
Тобукъ бюгебиз, тилейбиз,
Джандет джарыгъын излейбиз.

Гюнахларыбыз къайнайла,
Бизни бек байлаб, ойнайла.
Сеннге джалбарыб айтабыз,
Кеч деб, тобагъа къайтабыз.

Дуния джюзюн джаратханса,
Кёкден Кюнню къаратханса,
Джан салычу Раббийсе,
Хатерлисе, Къудуретлисе.



МАХТАУЛУ БИЗНИ ТЮЗЕТ

АЛЛАХ залим тахтаны Иесид,
Ол дунияланы Патчахыд.
Хакъимди, Къоруулаучуд, Бирд, кесид,
Кёклени, джерни АЛЛАХЫД.

Уллу махтаулары туталгъан олд,
Саулай дунияны джарытхан.
Патчахха элтген, сууаб, джарыкъ джолд,
Олд джашау берген, джылытхан.

Сеннге баш урабыз, Я АЛЛАХ,
Буйрукъларынгы толтуруб.
Болушлукъ излейбиз сууаблы хазна,
Игиликни тутуб, болдуруб.

Сенден тилейбиз, бизни тюзет,
Насыблы болсун тегерек.
Къарамынгы суутма бизледен,
Акъял бер, тазала джюрек.

Сен суйгенлеге, къош джазыкъсыныб,
Сакъла бизни чамланнганынгдан.
Насыбда джашайыкъ, сууабланыб,
Игилик этиб, тюз тутуб сан.



ТЮНАХЛЫКЪНЫ
КЪАРА
ПУБАНЫ

ИМАНЫНГЫ КЪУРУТМА

Джин харифлени эшген
Бек терс джолну барады.
Хыйны этиб кюрешген
Уллу гюнах алады.

Къаламы бла ол джазыб,
Джинден тилек тилейди.
Кесине уру къазыб,
Отдан юлюш излейди.

Шыбырдайды да бютюн,
Къара кючден толады.
Шайтан басыб аны юсюн,
Аны бийи болады.

Аллай адам АЛЛАХХА
Берген сёзюн бузады.
Шынкъартха элтген джолгъа
Кесин хаман урады.

Тыйса эди терк кесин
Ол, кёблени алдамай.
Къурандан кетген эсин,
Джыйыб, тюз джол ташламай.

Сурадан аят окъуб,
Керти билим алса эд.
Ашхы муратдан толуб,
Ислам динде барса эд.

Адамланы сынаргъа,
АЛЛАХ джерге ийгенди.
"Меннге баш уругъуз"-деб,
Уллу буйрукъ бергенди.

Сынауна тынчд мадары,
Бир АЛЛАХХА къайтайыкъ.
Тюз джюрекни къадары,
Кёб махтаула айтайыкъ.



ШАЙТАН КЮЧГЕ БАЗАДЫ

Шайтан джолну барырма деб, созады,
Эришиуде къара джинни озады.
Кир джумушун атмайды ол, къоймайды,
Бир джарлыны къанын ичмей тоймайды.

Зар кёзлери шайтан кючге базады,
Кир къоллары хыйны дууа джазады.
Хыйлачыды, эки тонну киеди,
Къара кючюн тегерекге иеди.

Сууаблыкъгъа, кертиликге ийнанмайд,
Терс зат этсе, сагъышланыб, къыйналмайд.
Ибилисни джоругъун чырт къурутмайд,
Айтханын да этиб турад, унутмайд.

Уллу, гитче гюнахланы джутады,
Аманлыкъны иннетлерин тутады.
Шайтан кёз бла башхалагъа къарайды,
Кёб зарлыкъны джюрегинде сакълайды.

Динин сатыб, терсине къурулгъанды,
Ибилисни джолуна ол бурулгъанды.
Кюнден-кюннге гюнахын ёсдюреди,
Кёб адамгъа заранын джетдиреди.

Аллай адам керти джолдан кетеди,
Кесине да зарауатлыкъ этеди.
Сууаблыкъдан кенгдеди, тыйылады,
Шайтанны къучагына джыйылады.

Сау дунягъа ол ачыуун чачады,
Алдауукъгъа джюрегин кенг ачады.
Шайтан юйден ары-бери къарайды,
Хар кимден кесин мийикге санайды.

Ол насыбсыз ишин тамам сюеди,
Гюнахланы отларында кюеди.
Джюрегинден тюзлюкню къурутады,
Ислам динни, Къуранны унутады.

Къатышады, сууаблыкъла табалмайд,
Къайгъыдады, тангы рахат аталмайд.
Къыямат Кюн сууаблыгъа сукъланныкъды,
Азабланы тёрюнде булгъанныкъды.



ХЫЙНЫЧЫНЫ ШАРТЛАРЫ

Хыйнычы сорад баргъанны атын,
Анасыныкъын, аны атасын.
Хапарлайд, излейд гыл тюшер бир зат,
Джигине дери сорады джюз къат.

Болушуруна керти сёз беред,
Хыйла къанатын адамгъа керед.
Къатлайд къара къыппаны халысын,
Седиретед биреуню хазнасын.

Ашыгъыб айтыр, хапар, тютюнлеб,
Ол багъалы зат беририн излеб.
Дагъыда къайтыр сагъышлы башлаб,
Эсин гыл тюшеригине бошлаб.

Карт салыр, неда ташчыкъла тартыр,
Шайтан уядан мыдах къаратыр.
Суучукъ ичирир, санар кюнлерин,
Иер джарлыгъа къара кючлерин.

Неда бир башха затланы этер,
Ол кёзбаулукъну тёрюне джетер.
Джин джазыуланы, учуруб, эшер,
Къуджур харифле бла мыйысын тешер.

Кёб тюрлю затны анга узатыр,
Акъылын алдауукъгъа джасатыр.
Бурун тюбюне шыбырдаб джюрюр,
Тюкюрдюм деб, джин тылпыуун юрюр.

Экинчи, ючюнчю келирин излер,
Иш битмесе да, ол кесин тюзлер.
Аны ачхасын, рысхысын джутар,
Джанына сингиб, джарлыны утар .

Отда джандырыб, аны джылатыр,
Кесине, юйюне азаб сынатыр.
Джашауун аны терсейтир, бузар,
Шайтан джолунда ашыгъыр, къызар.

Сен билдинг эсенг алай болгъанын,
Ол адам шайтан, джинден толгъанын.
Кёрге излеме аны сыфатын,
Джюрекден атма АЛЛАХНЫ атын.



Утар – хорлар.

ДЖИНЛЕ

Джинле хар неде башхалла адамдан,
АЛЛАХ джаратханды аланы отдан.
Адамны ызындан, кёрюнмей, къарайла.
Кёзлерин джандырыб, туру марайла.

АЛЛАХХА баш уругъа кереклисин
Биледиле ала, ол борчну кючюн.
Буюрулгъанд алагъа сууаб къатларгъа,
АЛЛАХ айтханнга тюшюнюб атларгъа.

Джинледен къоркъмазгъа керекди бютюн,
Адам, сууаблыкъ бла тазалаб юсюн,
Сагъышларында, алагъа теблетмей,
Джюрегини тёрюне бирин джибермей.

Болушлукъ да излеме сен аладан.
Къарайла билимсиз, кючсюз къаладан.
Болушурукъ бизге къуру АЛЛАХДЫ,
Ашхылыкъны деу кючюн тутхан Патчахды.

Сыйлы Къуран атханды артларына,
Джыйгъанд джинлени къабларына.
Аланы къурагъанны билдиргенди,
АЛЛАХНЫ заимлигин кёргюзгенди.



ИБИЛИСНИКИЛЕ

Ибилисникиле, анга ишлегенледиле,
Кука аманлыкъгъа батылыб.
Ала шайтанны бек суйгенледиле,
Сукъландырыууна алданыб.

Аллайла анга ушаш болуб къаладыла.
Бетлерин, ырызларын да атыб.
Джерге аманлыкъны кючюн джаядыла,
Динлерин, тиллерин да сатыб.

Тюз джолдан аджашдырыргъа излейдиле
Бирсини, алдаб, лагъым этиб.
Къыйнаб, тирилтиб, аны бла кюрешедиле,
Душман бла гюнах джолну кетиб.

Ала Ибилис бла бирге кюерикдиле,
Ачы отну ауузуна тюшюб.
Мугур санларын, башларын тюерикдиле,
Бютеулей къыйынлыкъда юшюб.



ШАЙТАНДАН САКЪЛАНЫРСА

АЛЛАХХА керти ийнаннганнга,
Бармайды шайтанны ачыуу.
Патчахны джюрекде тутханнга,
Джетмейди аны къарыуу.

Гюнахлыгъады, джауну, шайтанны,
Учууу, джюрек тебиую.
АЛЛАХХА кьошакъ айтханны,
Юсюнде эркин ёсюую.

АЛЛАХ сюргенд Ибилисни узакъ,
Болмазча орну кёкледе.
Анга буюргъанд джаханим-тузакъ,
Къалмазча сыйлы чекледе.

Ислам динни джюрюсенг ичин,
Кёрсенг огъурлу тангларын,
Мамырлыгъын, джарыкъ мийигин,
Алгъышлы сууаб тауларын,

Шайтандан толу сакъланыргъа
АЛЛАХДАН тилесенг, къайтыб,
Ол кюч берир къорууланыргъа,
Излесенг джюрекден айтыб.



МАГЪАНАСЫ

Керти зат толү кёрюннген нюрдю.....	4
КЪУТХАРЫУНУ ЧОКЪУРАГЪЫ.....	6
1. АЛЛАХНЫ къудурети	7
2. Нюр джарыкъ.....	9
3. Зекаят	10
4. Ораза	11
5. Хадж	13
6. Джашауну магъанасы	16
7. Мухаммад файгъамбар.....	18
8. Муслиманчылыгъынг.....	20
9. Къутхарыуну чокъурагъы	22
10. АЛЛАХ туруду	24
11. Къуран	27
12. АЛЛАХХА махтау.....	28
13. АЛЛАХНЫ скойгенле	30
14. Садакъа	31
15. Муслиман болур	33
16. Сезерсе сууабны скойоннгенин.....	35
17. Джууаблылыкъны сез.....	37
18. Ийнаныу джюрекден къурумасын.....	38
19. АЛЛАХХА берилеиик	39
20. Джумушакъ ангылат	41
21. АЛЛАХНЫ сюейик	42
22. Рысхыгъа берилген	43
23. Болурбуз кечилирге	48
24. Сууаб ишни унутма	49
25. Нюр джулдуз джанар	50
26. Билим	51
27. Намаз	52
28. Межгит	53
29. АЛЛАХХА толү ышан	54
30. АЛЛАХ гюнахын кечед къулуну	55
31. Палахдан, азабдан сакълар.....	56
32. Джандет	58

33. Сеннге джетгенни эт.....	60
34. Джаханым джутарыкъды.....	61
35. АЛЛАХ бирди	63
36. Кёргюзтейик тирилик	64
37. Иманлы болайыкъ	65
38. Излегенини къулуду	67
39. Разыма АЛЛАХХА	69
40. Береди онгла	70
41. Йеси сакъларыкъды	71
42. Дунияланы Бийиди	76
43. Джандетде зауукъланырса	77
44. Ёксюзню хакъы	79
45. Игилик къатлау	80
46. Тюрленмейди.....	81
47. Динни татлылыгъы	83
48. Берилликди джууаб.....	85
49. Джангы зат тюрлениудю	86
50. Дуния Бийге боисунайыкъ.....	87
51. Ачыуланма.....	88
52. Бёгекликни юсден къурутайыкъ.....	89
53. Сууаблыкъны джолу	91
54. Кесине этед аманлыкъ.....	93
55. Джумушакълыкъ	94
56. АЛЛАХХА къайтайыкъ	95
57. Джюрекдени джарытханд	97
58. Тёзюм нюрдю	98
59. Уллу махтау береме.....	99
60. АЛЛАХ кёргюзгенча барайыкъ.....	101
61. Сууаб гюллери ёсюб.....	103
62. Уллу ширк этме	104
63. АЛЛАХХА баш ур.....	105
64. Унутма АЛЛАХЫНГЫ.....	108
65. Сени шохларынг	109
66. Джашамайды турса да джылтыраб	110
67. Гитче ширк	112

68. Ийнаныргъа керекди	113
69. Къутхарлыкъ харакет	114
70. Иман джюрекге сингсе	115
71. Къоркъайыкъ джакъсызлыкъдан.....	117
72. Ашхы мурат	118
73. Тюз билим ал	119
74. Ол бизни кёред	120
75. Сууаб хазна.....	121
76. Уялыу	122
77. Насыб бла джет.....	123
78. Къыямат Кюн.....	124
79. Тюшюнейик.....	125
80. Сёзчю.....	126
81. Алданнганла	127
82. Кука бети тюлдю таза.....	128
83. Зарлыкъ	129
84. Терсейгенле.....	130
85. Тёрттизгинле.....	131
АЛЛАХНЫ КЪУДУРЕТИ.....	137
86. АЛЛАХНЫ 99 аты.....	138
87. Махтаулу.....	141
88. АЛЛАХНЫ бек алапат атлары.....	145
КЪУТХАРЫУНУ НЮРЮ	165
89. Иманлы эт Я АЛЛАХ.....	166
90. Тюзюне барайыкъ.....	168
91. Я АЛЛАХ, сен къутхар.....	170
92. Кючлюдю, Къудуретлиди.....	172
93. Махтаулу бизни тюзет	174
ГЮНАХЛЫКЪНЫ КЪАРА ТУБАНЫ.....	175
94. Иманынгы къурутма.....	176
95. Шайтан кюнге бадады	178
96. Хыйнычыны шартлары.....	180
97. Джинле.....	182
98. Ибилисникиле.....	183
99. Шайтандан сакъланырса.....	184

Хусеин Узеирович Лепшоков

ДОРОГА ПРАВЕДНОСТИ

99 стихотворении о религии Ислам

На карачаевском языке

Бу китабны чыгъарыргъа болушхан
Аппакъланы Эльзаргъа уллу бюсюреу этеме.
Сууаблыгъы аны атасы Абдулну болсун.

Автор

Формат 60 x 80 $\frac{1}{16}$

Бумага офсетная.

Печ.л. 11,75

Тираж 500 экз.

Заказ № 17